



Stručna služba općinskog vijeća i općinskog načelnika

Broj: 01/1-02-2741/17

PRIJEDLOG

Ilijaš, 30.11.2017. godine

Z A P I S N I K

sa 14. (četnaeste) sjednice Općinskog vijeća Ilijaš, održane dana 30.11.2017. godine, sa početkom u 10:00h.

Četnaestom sjednicom Općinskog vijeća Ilijaš predsjedavao je zamjenik predsjedavajućeg OV-a Ilijaš g-din Alen Hasković.

Prisutni vijećnici:

RB.	IME I PREZIME
	SDA
1	MAHIR DEVIĆ
2	ANEL BUMBULOVIĆ
3	MUAMER DERVIŠEVIĆ
4	ALMA OMEROVIĆ
5	MEHMED SINANOVIĆ
6	ADEM ALIĆ
7	SAUDIN DURMIĆ
8	ARMIN MATORUGA
9	SEMIRO DEDIĆ
10	HALID DIZDAREVIĆ
11	RASIM ŠEHIĆ
12	MELISA MATORUGA
13	ALEN HASKOVIĆ
	SDP
14	ALAN ŠERAK
15	DAMIR FILIPOVIĆ
16	MIRSAD OSMANOVIĆ
	SBB-FAHRUDIN RADONČIĆ
17	AKIF BEŠLIJA
18	SEAD ŠEHIĆ
	BPS-SEFER HALILOVIĆ
19	MUHAMED HANDŽIĆ
20	ALMIR ŠPIODIĆ
	GS
21	-
22	ASIM MUJIĆ
	SAMOSTALNI VIJEĆNIK
23	SEMIRO DIZDAREVIĆ
	LDS
24	MEHO DŽINDO
	STRANKA ZA SREDNJE
25	BESIM GLJIVA

Odsutni vijećnik:

1. Edhem Hasanović

Prisutni gosti:

1. Nermina Durić-Kahvedžić - Radio Ilijaš
2. TV Vogošća
3. TV SA
4. Mehmed Smajlović – predsjednik Savjeta MZ Mrakovo
5. Mirsad Hamzić - predsjednik Savjeta MZ Malešići
6. Alen Matoruga – predsjednik Savjeta MZ Misoča
7. Enisa Mešetović – koordinatorica Radne grupe za realizaciju projekata " Izrada Strategije za mlade općine Ilijaš za period 2018-2022."
8. Edhem Bičakčić – predstavnik projektantske kuće
9. Mensud Pekmez – direktor Ekoenergetika consultantska kuća
10. Samir Čengić – predstavnik consultantske kuće
11. Arben Ljuša- predstavnik consultantske kuće

Ostali prisutni:

1. Akif Fazlić – općinski načelnik
2. Sanja Zagorac-Jozić – pomoćnik načelnika
3. Sadeta Brkić – pomoćnik načelnika
4. Meliha Avdibegović – pomoćnik načelnika
5. Merima Osmanović – pomoćnik načelnika
6. Zdravko Barić – pomoćnik načelnika
7. Nijaz Spahić – pomoćnik načelnika
8. Ilda Kahriman – sekretar OV-a Ilijaš
9. Adha Masnopita – stručni saradnik u Službi za društvene djelatnosti i poslove mjesnih zajednica
10. Sadik Alić – komunalni inspektor
11. Nejra Ćosić - volonter
12. Đenan Suša – IT administrator
13. Maida Habibović - zapisničar

ALEN HASKOVIĆ – zamjenik predsjedavajućeg OV-a

Otvorio je sjednicu i konstatovao da postoji kvorum za odlučivanje (prisutno 24 vijećnika).

Zatim je dao na razmatranje zapisnik sa 13. sjednice OV-a.

Primjedbi na zapisnik nije bilo, pa je Općinsko vijeće jednoglasno usvojilo zapisnik sa 13. sjednice OV-a Ilijaš.

Pročitao je predloženi dnevni red i dao na razmatranje.

AKIF FAZLIĆ – općinski načelnik

Kao predlagač povlači tačku 13. Prijedlog Odluke o davanju saglasnosti za dodjelu koncesije za istraživanje i eksploataciju mrkog uglja sa dnevnog reda. Zahtjev od JP Elektroprivreda BiH – Zavisno društvo mrkog uglja Breza zaprimili smo pred sami

momenat upućivanja materijala za Kolegij OV-a, te smo procijenili da trebamo obaviti dodatne konsultacije sa Ministarstvom privrede Kantona Sarajevo i resornim federalnim ministarstvom, tako da poslije ovih konsultacija ćemo ovu tačku vratiti na dnevni red na razmatranje Općinskom vijeću.

Primjedbi nije bilo, pa je OV-e jednoglasno usvojilo slijedeći

DNEVNI RED

1. Vijećnička pitanja i inicijative
2. Izvještaj o realizaciji zaključaka sa 13. sjednice
3. Informacija o izvršenju Budžeta općine Ilijaš za period 01.01.-30.09.2017. godine
4. Nacrt Budžeta općine Ilijaš za 2018. godinu
5. Nacrt Odluke o izvršavanju Budžeta općine Ilijaš za 2018. godinu
6. Prijedlog Odluke kojom se daje saglasnost općinskom načelniku za sklapanje ugovora o osnivanju stvarne služnosti na poslužnoj nekretnini u korist titulara prava stvarne služnosti DD BH Telecom Sarajevo
7. Prijedlog Odluke o zonama sanitarne zaštite i zaštitnim mjerama za izvorište Junakovac
8. Prijedlog Odluke o zaštitnim zonama i zaštitnim mjerama izvorišta "Sokolina"-Srednje, općina Ilijaš
9. Prijedlog Odluke o zaštitnim zonama i zaštitnim mjerama izvorišta "Crepala" i "Ajkunino vrelo"
10. Prijedlog Odluke o zaštitnim zonama i zaštitnim mjerama izvorišta "Jasikovac" i "Kokočino vrelo", MZ Kamenica, općina Ilijaš
11. Prijedlog Odluke o davanju saglasnosti za dodjelu koncesije za izgradnju hidroenergetskog objekta na području općine Ilijaš-mHE Podlugovi
12. Prijedlog Odluke o davanju saglasnosti za dodjelu koncesije za izgradnju hidroenergetskog objekta na području općine Ilijaš-mHE Ljubnići
13. Prijedlog Odluke o izmjeni i dopuni Odluke o dodjeli mandata za članove Savjeta mjesnih zajednica na području općine Ilijaš
14. Prijedlog Odluka o:
 - a) usvajanju Regulacionog plana "Gornji Kadarići"-Ilijaš
 - b) provođenju Regulacionog plana "Gornji Kadarići"-Ilijaš
15. Prijedlog Odluka o:
 - a) usvajanju Izmjena i dopuna Regulacionog plana "Luke"-Ilijaš (skraćeni postupak)
 - b) provođenju Izmjena i dopuna Regulacionog plana "Luke"-Ilijaš (skraćeni postupak)
16. Prijedlog Odluka o:
 - a) usvajanju Izmjena i dopuna Regulacionog plana "Centar Ilijaš" (skraćeni postupak)
 - b) provođenju Izmjena i dopuna Regulacionog plana "Centar Ilijaš" (skraćeni postupak)
17. Prijedlog Odluka o:
 - a) usvajanju Izmjena i dopuna Regulacionog plana "PDI BOSNA" (skraćeni postupak)
 - b) provođenju Izmjena i dopuna Regulacionog plana "PDI BOSNA" (skraćeni postupak)
18. Prijedlog Odluke o pristupanju izradi Izmjena i dopuna Regulacionog plana Banovac

19. Prijedlog rješenja iz imovinsko-pravne oblasti broj: 06/1-31-2388/17

20. Nacrt "Strategije prema mladima općine Ilijaš sa Akcionim planom 2018-2022.".

AD-1

Vijećnička pitanja i inicijative

ALMIR ŠPIODIĆ – vijećnik BPS-Sefer Halilović

Pitanja:

1. Zašto još nisu krenuli radovi na rekonstrukciji Društvenog doma u Podlugovima? Slična pitanja sam postavio na 12. sjednici Općinskog vijeća Ilijaš i dobio sam konstruktivan odgovor da je proveden postupak javnih nabavki i da je u toku provedba tenderske procedure. Dobio sam i Odluku o izboru najpovoljnijeg ponuđača. U odgovoru piše da će radovi početi odmah po zaključivanju prvo pojedinačnog ugovora, a završit će 2018. godine. Obzirom da je ugovor potpisan u oktobru, radovi još nisu počeli. Tražim da mi se dostavi kopija ugovora.
2. Pitanje za direktora mrkog uglja Braza: "Šta je uradio po pitanju Zaključaka koji su usvojeni na sastanku koji je održan 25.01.2017. godine u općini Ilijaš sa načelnikom općine Ilijaš, predsjednikom Savjeta mjesne zajednice Podlugovi i grupom građana Sovrla – naselje Marići čija je imovina obuhvaćena rudnim poljem i zbog toga ne mogu ostvariti pravo na građevinsku dozvolu?".

ARMIN MATORUGA – vijećnik SDA

Inicijativa:

1. Pokrećem inicijativu prema JP Elektroprivreda BiH Sarajevo s ciljem izgradnje transformatorske stanice za naselje Karaula, odnosno Gornja Karaula.

Obrazloženje: Mjesna zajednica Stari Ilijaš se u više navrata obraćala spomenutom javnom preduzeću i povratnim aktom broj: 03-4-34222-34076/2012 je odgovorila da je izgradnja trafostanice planirana u periodu od 2014-2017. godine. Obzirom da je 2017. godina na izmaku, zanima me kada je stvarno planirana izgradnja trafostanice Karaula i do kada će građani Karaule uredno plaćati neadekvatnu isporuku električne energije od strane Elektroprivrede Sarajevo?

SEMIR DIZDAREVIĆ – samostalni vijećnik

Pitanja:

1. Da li je u planu postavljanje cijevi u potok kod mjesta Zagonica u naselju Dedići?

Obrazloženje: Na zahtjev stanovnika naselja Dedići, molim da mi se dostavi informacija kada će biti postavljene cijevi u potok kod mjesta Zagonica? Prema informacijama koje sam dobio na licu mjesta, iste su već bile planirane za postavljanje, ali iz nepoznatog razloga nisu. Molim da se ovo provjeri, te da ako nije bilo planirano, da se planira.

2. Da li je u planu rekonstrukcija i obnova puta za naselje Dedići?

Obrazloženje: Put za naselje Dedići se trenutno nalazi u jako lošem stanju i rekonstrukcija

je neophodna. Konkretno, mislim da put od raskrsnice za Dediće (od bivšeg štaba Odreda "Tale"-ili gdje se autobus okreće) do kraja Dedića. Ima li prostora da se u Budžetu za 2018. godinu ovo planira?

3. Da li je u posljednjih 5-6 mjeseci došlo do promjene obračuna računa za vodu od strane JKP "Vodostan" Ilijaš?

Obrazloženje: Dobio sam primjedbe sugrađana koji stanuju u zgradama na povećan iznos računa i to za stavku "potrošačko mjesto" u iznosu od 2,00 KM. Dakle, u zgradi postoji jedan vodomjer, ali se svakom stanu obračunaju 2,00 KM za potrošačko mjesto, a ono je samo jedno, što znači, da ako je u zgradi primjera radi 15 stanova, JKP "Vodostan" naplati 30,00 KM za jedno očitavanje, a trebao bi naplatiti 2,00 KM. Ovo su građani primjetili u zadnjih 4-5 mjeseci da je samo jednom počelo da se naplaćuje, bez da su dobili neko obavještenje ili dopis. Također, na Internet stranici nema nikakvog obavještenja za isto. Molim da mi se dostavi informacija zbog čega se svakom stanu obračuna 2,00 KM na osnovu potrošačkog mjesta. Da li postoji Odluka za isto i ako da, da mi se dostavi kao i plan utroška novca koji je prikupljen na ovaj način.

4. Postoji li mogućnost uklanjanja ruševnih objekata koji se nalaze duž puta prema naselju Dedići?

Obrazloženje: U razgovoru sa stanovnicima pomenutog naselja kao jedan od mnogobrojnih problema su naveli i problem starih, napuštenih i ruševnih objekata uz put koji vodi prema Dedićima. Ti objekti predstavljaju opasnost za mještane naselja, a posebno djecu koja tim putem idu od kuće do autobuske stanice. Tim objektima jako malo fali da se sruše na sam put, a i vremenom su postali leglo zmija, pasa lutilica i sl. Molim nadležne službe da provjere da li su stečeni zakonski uslovi za uklanjanje istih i ako jesu da se pokrene proces uklanjanja.

Inicijative:

1. Pokrećem inicijativu da se u naselju Dedići postave kontejneri za odlaganje otpada.

Obrazloženje: Trenutno nema niti jedan kontejner postavljen u Dedićima i prvi najbliži kontejner je udaljen skoro kilometar (na autobuskom okretalištu). Molim da se što je moguće prije izvrši postavljanje istih.

2. Pokrećem inicijativu da se u naselju Dedići izvrši pregled i popravak ulične rasvjete.

Obrazloženje: Prema izjavama stanovnika naselja Dedići, trenutno ulična rasvjeta radi na svakoj trećoj ili četvrtoj banderi. Obzirom da je zimsko računanje vremena i da mrak padne jako brzo, molim da se hitno izvrši sanacija istih.

3. Pokrećem inicijativu da se u Gornjoj Misoči izvrši zamjena rasvjetnih tijela ulične rasvjete.

Obrazloženje: Ponovo na području Gornje Misoče većina ulične rasvjete ne radi. Ranije su mijenjane sijalice, ali iste jako brzo pregore, jer su popucala zaštitna stakla na istim. Isto tako, postoji par nosača sijalica koji su savijeni ili pukli. Molim da se izvrši zamjena kompletnih rasvjetnih tijela (sijalica sa nosačem), a ne samo sijalica radi gore pomenutih razloga.

BESIM GLJIVA – inicijative

1. U narednoj zimskoj sezoni obezbjediti adekvatnije održavanje puta na potezu Donji Čevljanovići – Gajevi, prvenstveno kada se radi o posipanju istog u vrijeme poledice. Na samom početku ovogodišnje sezone došlo je do navedenih problema. Također je neophodno odmah na proljeće izvršiti sanaciju udarnih rupa i odvoda voda sa navedenog puta.
2. Drugi put upućujem inicijativu BH Telecomu da iznađe mogućnost obezbjeđivanja Internet signala i TV kanala putem Moja TV za šire područje Gajeva. Napominjem da na istom području postoje izgrađeni antenski stubovi koji su u vlasništvu BH Telecoma i da je sve veći broj građana koji zbog navedenog problema odjavljuju usluge fiksne telefonije BHT i prelaze na druge operatere.
3. Na koji način ugraditi hlorinator na vodozahvat Vrela? Vodovod nije pod ingerencijama JKP "Vodostan" Ilijaš.
4. Kada će biti dovršeni određeni nedostaci na novorekonstruisanom putnom pravcu Donja Vogošća – Malešićki most? Neophodno je dovršiti slijedeće radove:
 - autobuska stajališta do kraja uraditi i pojedina proširiti (Malešići)
 - regulisati uzurpaciju zemljišta prilikom izgradnje puta pojedinim stanovnicima (spisak ima općina)
 - obezbjediti pristup individualnim objektima sa navedenog puta iscrtavanjem isprekidane linije
 - izraditi treću isključnu traku kod Malešićkog mosta, skretanje za Beroviće u okviru državnog zemljišta koje postoji
 - postaviti adekvatno upozorenje i znakove sa upozorenjima o kretanju đaka i o blizini škole.

Pitanja:

1. Kada će biti dovršeni radovi na projektu kanalizacije u neposrednoj blizini škole u Malešićima, obzirom da je ista ostala otvorena i predstavlja opasnost za učenike i ostalo stanovništvo?

ALAN ŠERAK – vijećnik SDP-a

Pitanja:

1. Tražim da mi se dostavi mišljenje našeg pravobranioca u vezi sa općim sporazumom koji se odnosi na rekonstrukciju i održavanje postojećih cesta na području općine Ilijaš. Obzirom da je poznato da je općina Ilijaš vršila i vrši izgradnju novih putnih pravaca, zanima nas da li iz postojećeg okvirnog sporazuma mogu proizaći novi ugovori za izgradnju novih putnih pravaca, obzirom da se okvirni sporazum odnosi na već postojeću putnu infrastrukturu, te da li su predmetne nabavke izvršene u skladu sa Zakonom o javnim nabavkama BiH?

MIRSAD OSMANOVIĆ – vijećnik SDP-a

Pitanja:

1. Koja pravna i fizička lica vrše nelegalnu eksploataciju kamena na području općine Ilijaš i koje su mjere preduzete na sprječavanju istih?
2. Da li je nadležni općinski organ upoznat odakle izvođač radova na izgradnji putne infrastrukture na općini Ilijaš vrši nabavku kamenog materijala za izgradnju iste?

DAMIR FILIPOVIĆ – vijećnik SDP-a

Pitanja:

1. Obzirom da je opće poznato da je prostor općine Ilijaš jedan od najzagađenijih prostora u Kantonu Sarajevo u pogledu kontaminiranosti terena NUS-om, zanima me na kojim lokacijama je izvršeno deminiranje u 2017. godini obzirom da je budžetom za ovu godinu predviđeno 20.000,00 KM?
2. Da li općinski načelnik namjerava u skorije vrijeme da zgradu općine učini pristupačnom za lica sa umanjenim fizičkim sposobnostima, pri tom misleći na lift koji je bio predviđen kao stavka Budžeta za 2017. godinu?
3. Više puta upućivana inicijativa za izgradnju trotoara na lokaciji Stari Ilijaš, tačnije od Malešićkog mosta do firme Tranzit, te nas zanima kada se ista namjerava realizirati?
4. Molim da se vijećnicima dostavi akt kojim se definišu nadležnosti na pojedina stručna radna tijela Općinskog vijeća, prijedloge za raspodjelu sredstava iz pojedinih grantova dostavljaju općinskom načelniku, a ne općinskom vijeću.

MUHAMED HANDŽIĆ – vijećnik BPS-Sefer Halilović

Pitanje:

1. Da li je u skladu sa Regulacionim planom izgradnja i postavljanje niša za kontejnere na području MZ Ilijaš Grad, ako jeste zbog čega nije provedena javna rasprava u vezi njihovog instaliranja, a koja je morala biti provedena shodno članu 25. Zakona o principima lokalne samouprave FBiH u MZ Ilijaš Grad i članu 4. Zakona o prostornom uređenju?

ADEM ALIĆ – vijećnik SDA

Inicijativa:

1. Pokrećem inicijativu da se na lokalnim putevima (raskrsnica Gnionica i kod Amkove radnje) u MZ Mrakovo postave znakovi izričitih naredbi i opterećenja lokalnog puta (STOP ili nailazak na put sa prvenstvom prolaza i da nije dozvoljen saobraćaj za vozila preko 7 tona).

Obrazloženje: Na pomenutim lokacijama zbog nepostojanja signalizacije svjedoci smo čestih saobraćajnih nezgoda zbog nepoštivanja prava prvenstva prolaza. Da bi spriječili gore pomenute nezgode podnosim datu inicijativu.

2. Pokrećem inicijativu da se na izlazima sa lokalnih puteva iz pravca Marine i Haluga – Šigalište u Salkanovom Hanu i pravca od džamije u Mrakovu postave ogledala.

Obrazloženje: Na pomenutim lokacijama zbog nepreglednosti postoji velika opasnost od saobraćajnih nezgoda.

AD-2

Izveštaj o realizaciji zaključaka sa 13. sjednice

Diskutanata po ovoj tački dnevnog reda nije bilo, pa je Općinsko vijeće jednoglasno usvojilo

Izveštaj o realizaciji zaključaka sa 13. sjednice

AD-3

Informacija o izvršenju Budžeta općine Ilijaš za period 01.01.-30.09.2017. godine

MERIMA OSMANOVIĆ – pomoćnik načelnika

U izvještajnom periodu 01.01.-30.09.2017. godine Budžet općine Ilijaš je ostvario 11.204.877,00 KM prihoda, što predstavlja 75 % od planiranih prihoda u Budžetu za 2017. godinu. Prenesena namjenska sredstva iz prethodne godine iznose 873.400 KM prenesena sredstva po tekućem prilivu iz prethodnog perioda iznose 1.850.500,00 KM. Sa druge strane ostvareni su izdaci u iznosu od 6.815.172,00 KM, što predstavlja 45 % od planiranih izdataka u Budžetu za 2017. godinu. Prema tome ostvaren je suficit u navedenom periodu u iznosu od 4.389.705,00 KM. Da ste imali potpuniji uvid u rashodovnu stranu budžeta služba je pored redovne pripremila i dodatnu informaciju tako da sa današnjim danom rashodovna strana budžeta iznosi cca 10.000.000 KM. Odnosno izvršenje se kreće od 60 %. U toku je i realizacija brojnih projekata čija potpuna implementacija se očekuje u periodu krajem IV kvartala čime će izvršenje odnosno rashodovna strana dostići nivo planiranih sredstava.

Porezni prihodi u izvještajnom periodu u odnosu na planiranu veličinu na godišnjem nivou su ostvareni u procentu od 78 %. U ukupnoj strukturi ovih prihoda najveći prihodi su ostvareni po osnovu poreza na imovinu kao i porez na promet nepokretnosti i prava i prihodi od indirektnog oporezivanja koji pripadaju jedinicama lokalne samouprave.

Kada se tiče neporeznih prihoda ostvareni su u procentu od 89 % u odnosu na plan ili 2.219.500,00 KM. U ukupnoj strukturi ovih prihoda najveći prihodi su ostvareni po osnovu naknada za izgradnju i uređenje građevinskog zemljišta, po osnovu komunalne takse, administrativne takse, ostale prihode od imovine. Ostvarenje prihoda je na nivou u odnosu na planirane veličine i kad su u pitanju prihodi po osnovu tekućeg granta za posebne namjene od Kantona Sarajevo koji bilježe ostvarenje od 67 %. U strukturi ovih prihoda, prihodi po osnovu redovnih tekućih transfera kantona je ostvaren u iznosu od 443.540,00 KM. U strukturi ovih namjenskih prihoda evidentirani su prihodi i to: prihodi od Ministarstva za boračka pitanja za boračku populaciju po osnovu Zakona o dopunskim pravima boraca u iznosu od 245.096,00 KM prihodi od Ministarstva obrazovanja Kantona Sarajevo u iznosu od 192.477,00 KM, a odnose se na subvencioniranje prevoza učenika osnovnih i srednjih škola. Prihodi od odnacija ostvareni su u iznosu od 80.100,00 KM što u odnosu na plan iznosi 73% prihodi se odnose na učešće građana MZ Mrakovo i Podlugovi za rekonstrukciju puteva kao i učešće KJU Zaštićena područja KS za sufinansiranje putne komunikacije u iznosu od 50.000 KM. Kapitalni transferi od ostalih nivoa vlasti ostvareni su

u iznosu od 1.474.106,00 KM što u odnosu na plan predstavlja 45 %. Kapitalni transferi od Federacije u iznosu od 108.106,00 KM za Industrijsku zonu Luka Ilijaš. Kapitalni transferi od KS su ostvareni u iznosu od 1.351.000,00 KM gdje izdvajamo transfer Ministarstva komunalne privrede i infrastrukture za rekonstrukciju filter postrojenja Karašnica u iznosu od 500.000 KM, 300.000 KM za izgradnju tržnice Banovac, 300.000,00 KM za rekonstrukciju vodovodne i kanalizacione mreže i 100.000 KM za istražno opitnu bušotinu za zahvatanje podzemnih voda u Gornjoj Misoči. Ministarstvo zdrastva za projekat energetske efikasnosti za blok II Doma zdravlja Ilijaš. Kapitalni transfer od općine Centar u iznosu od 15.000 KM za nabavku vozila za Civilnu zaštitu. Kada se tiče rashodovne strane bruto plaće i naknade uposlenim izvršene su u iznosu od 1.236.570,00 KM i predstavlja 66% planiranih sredstava na godišnjem nivou. Sredstva za bruto plaće ostvarena su u procentu od 68 % od planiranih sredstava na godišnjem nivou, dok su sredstva za naknada uposlenim ostvarena u procentu od 58%. Doprinosi poslodavca ostvareni su na nivou planiranih sredstava na godišnjem nivou. Izdaci za materijal i usluge izvršeni su u iznosu od 555.729,00 KM što je 54 % planiranih sredstava na godišnjem nivou. Struktura ove grupe izdataka analitički prikazana u "posebnom dijelu" Informacije te je nećemo posebno obrazlagati. Kada se tiče pozicije tekući transferi, evidentirani su izdaci u iznosu od 1.426.637,00 KM što procentualno iznosi 56% od planiranih izdataka ove vrste na godišnjem nivou, a u odnosu na isti period prošle godine je više za 3 %. U obrazloženju Informacije detaljno su obrazloženi izdaci za udruženja građana u izvještajnom periodu i ovim putem ih nećemo pojedinačno iznositi. Kapitalni transferi i izdaci su ostvareni u iznosu od 3.420.699,00 KM što je 37 % od planiranog godišnjeg iznosa. Sredstva Budžetske rezerve u izvještajnom periodu iznose 52.220,00 KM i to za rješavanje stambenog zbrinjavanja, pomoći za liječenje kao i pomoći za sanaciju štete nastale na zasadima voća kao posljedice niskim proljetnih temperatura (mraza i snijega).

Diskutanata po ovoj tački dnevnog reda više nije bilo, pa je Općinsko vijeće primilo k znanju

Informaciju o izvršenju Budžeta općine Ilijaš za period 01.01.-30.09.2017. godine

AD-4

Nacrt Budžeta općine Ilijaš za 2018. godinu

AKIF FAZLIĆ – općinski načelnik

Koristim priliku da u najkraćim crtama prezentiram nacrt Budžeta za 2018. godinu, obzirom da ćemo ući u javnu raspravu, tu ćemo dati svi svoje mišljenje, prijedloge sugestije, sve vas molim da kroz taj proces date svoj objektivan osvrt kako bi došli do prijedloga Budžeta koji će biti takav da zastupa interese svih političkih subjekata. U nacrtu smo predložili 16.220.000 KM, a struktura tih prihoda je slijedeća vlastiti prihodi, sve ono što pripada općinama kroz zakonska rješenja i ono što su aktivnosti općine su 9.235.000 KM, prije svega tu su rente, PDV, porez na prometne pokretnosti, usluge katastra te usluge drugih organa na osnovu kojih se stiče prihod. Slijedeća bitna pozicija jesu kapitalni grantovi od viših nivoa vlasti, prije svega ovdje se misli na Kanton Sarajevo i oni iznose 5.160.000 KM i želim da ovu cifru pocrtam kao uspjeh političkih aktivnosti što općina Ilijaš generalno vodi prema Kantonu, te da smo na bazi toga obezbjedili preko 5.000.000 KM, sredstava za projekte po namjenama kako su oni razvrstani u ovom kapitalnom dijelu nacrta Budžeta. Imamo i treću poziciju, prijenos sredstava 1.825.000 KM, koji proizilazi iz rebalansa

Budžeta Kantona Sarajevo 900.000 KM, znate da smo tu dobili 600.000 KM, za cestu Vlaškovo-Karaula, te 300.000 KM, za filter postrojenje za vodovod Sokolina a 925.000 KM, je tekući suficit, dakle to je 16.220.000 KM. Tekući prihodi sa jučerašnjim danom su ostvareni u iznosu od 9.842.000 KM i oni su razgraničeni namjenski u vrijednosti nekih 3.500.000 KM, tako da smo već sada na poziciji nekih 13.342.000 KM. Kada su u pitanju rashodi, generalno politiku koju vodimo već godinama, izdaci za materijalne troškove, izdaci za tekuće grantove su u okvirima naših utvrđenih politika, oni su negdje nijansirano povećani ili smanjeni ali je to uglavnom na bazi utvrđenih politika. Ono što se prvi put pojavljuje u zadnjih nekoliko godina, jeste povećanje plate organima uprave a ona proizilazi iz konkursa koji smo imali u ovoj godini koji je pred kraj, dakle 7 novih uposlenika i našeg plana da se u idućoj godini primi još 4 nova uposlenika. Kada su u pitanju kapitalni grantovi, ja ću ovdje naznačiti samo nekoliko najvažnijih, mislim da smo sve ono što smo govorili cijelo vrijeme i kroz vijeće te kroz ono što smo cijenili kao prioritete općine Ilijaš, ovdje nabrojali prezentirali, obuhvatili ono sve što cijenimo da je jako bitno za razvoj općine u 2018. godini, a neko nijansiranje ovoga kroz javnu raspravu možemo uraditi. Ja ću ovdje samo preći kratko, obzirom da se radi o veoma značajnim projektima. Kada su u pitanju kapitalni projekti iz sfere vodosnabdijevanja pokrećemo naš veliki projekat koji smo pripremali duže vremena, spremili smo projektnu dokumentaciju i sve ono što je potrebno, to je vodovod Vrutak sa 1.050.000 KM. U 2018. godini, imamo rekonstrukciju tržnice za filter postrojenje gradskog vodovoda Karašnica 280.000 KM, izgradnju filter postrojenja za upravljanje hladnoće na izvoristu Sokolina-Srednje u iznosu od 320.000 KM, izgradnja pumpne stanice na vodovodnom sistemu u Ljubničima Radča potok 50.000 KM. Vodotoci su uvijek u okviru sredstava koje imamo već nekoliko godina, ovdje od kanalizacionih sistema ono što će općina izravno voditi a odnosi se na nove kanalizacije, sve ostalo će raditi naš Vodostan. Ove godine smo, nakon nekoliko godina uradili projekte gasifikacije. Kantonalna vlada je najavila da će iduće godine ući u subvencioniranja plina kao energenta, kako bi pospješila veći broj priključaka, veću potrošnju ovog energenta u smjeru zagađenja okoline i mi ćemo raditi na izvršenju našeg sistema, znate da ima razveden sistem prema MZ Podlugovi i MZ Misoča da se on koristi u vrlo malom kapacitetu, vidjet ćemo kako će se ta politika vlade odražavati na povećan broj korisnika u ovoj sferi. Kada su u pitanju infrastrukturni projekti, po planovima MZ ovdje izdvajamo sanaciju i rekonstrukciju doma Ljubnići 75.000 KM kao značajan projekat, transferi za zdravstvo, nabavka novog ultrazvučnog aparata za RTG kabinet. Mi smo ušli u nacrt sa 60.000 KM i vjerovatnoća je da ćemo dobiti više sredstava da se kupi kvalitetniji aparat. Imamo i dogradnju Doma zdravlja, treća faza sa 110.000 KM. Kapitalni transferi pojedincima, ovdje naglašavam sufinansiranje i sanaciju i utopljavanje zgrada, stavili smo cifru od 50.000 KM, vjerovatno ćemo je u prijedlogu povećati obzirom da je vlada Kantona Sarajevo, zajedno sa Serdom i općinama Kantona Sarajevo definisala jedan zajednički projekat energetske efikasnosti koji bi se trebao pokrenuti na sistemski način, gdje bi svi trebali participirati na obezbjeđenju sredstava, ne samo za kolektivno nego i za individualno stanovanje. Transfer za školstvo, ovdje je akcenat dat na područne škole Bioča, Kamenica, Ljubnići, vrtić JU "Djeca Sarajeva" i Srednjoškolski centar. Kroz javnu raspravu ovog možemo još malo izdefinirati, cilj nam je da neke objekte u potpunosti završimo u idućoj godini, a da ne otvaramo sve i da ih završavamo po fazama. Kada su u pitanju kapitalni transferi za sport, ovdje imamo sanaciju i adaptaciju objekta sa 200.000 KM planirana, te pokrećemo ovaj naš veliki projekat, izgradnja sportskog centra u Ilijašu sa težištem na gradski stadion sa 600.000 KM, kao prvom fazom, jer želimo kroz taj objekat da dole stvorimo i dobre uslove i da damo taj novi pečat, imidžu našeg grada. Konačno ova ploha Dragoradi, koju već vučemo godinama, na bazi dokumentacija i svih

procjena ona bez 84.000. KM se neće moći završiti, tako smo i stavili u ovaj nacrt Budžeta. Vjerski objekti 75.000 KM, objekti kulturno-historijskog naslijeđa, ovdje je stavljeno i spomen obilježje Dragoradi za koje je sve praktično završeno, ovaj projekat bi trebao u prvoj polovini godine da se završi. Također, želim informisati vas kada su u pitanju naša mezarja u Brezi i u Solunu, da smo zajedno sa ministrom za boračka pitanja u ZDK i općinom Olovo napravili sporazum da općina obezbjedi 20.000 KM za Solun, 8.000 KM u ovoj godini i to smo realizirali i 12.000 KM u 2018. godini i ovdje pokrećemo jedan značajan projekat, to je projekat koji je proizašao na bazi prijedloga boračkih organizacija, projekat Milakov Doj u Misoči, projekat radno nazvan braniocima Misoče u vrijednosti od 80.000 KM. Mi imamo izgrađenu projektnu dokumentaciju i još ćemo izdefinisati detalje i želimo to u idućoj godini i pokrenuti. Ostali ekonomski poslovi, ovdje želim napomenuti da ćemo podržati i aktivnosti naše policijske stanice kako za njihovu opremu, ali naglašavam da smo ovdje izvršili projekat video nadzora saobraćajnica, raskrsnica pješačke staze. Projekat je dizajniran tako da pokrije prije svega regionalni put, ključne tačke na regionalnom putu od Starog Ilijaša do raskrsnice prema Brezi kao faza koju je ministarstvo, odnosno policijske strukture utvrdili kao nešto što je najbitnije i on je uvršten u ovaj prijedlog. Kapitalni transferi javnim preduzećima, prije svega Vodostanu 642.000 KM, idemo dalje na rekonstrukcije na naše vodovodne mreže i izgradnju kanalizacione mreže kako je dato u rasporedu ovih pozicija. Ovdje su značajno tretirani projekti iz sfere ekologije, razvijanje sistema, sistem kanti, dvosmjerni odvoz smeća, izgradnja reciklažnog dvorišta i rehabilitacija stare deponije u Lješevu. Nabavka zemljišta vrlo respektabilna stavka 670.000 KM, imamo potrebu za drugu fazu industrijske zone, za gradski stadion u Ljubnićima, ovdje smo povećali stavku, ona je bila u Budžetu u ovoj godini i nije realizirana, sad smo povećali na nivo cijene koju smo imali za otkup zemljišta kod gradskog stadiona i naglasit ću da je ovdje otvoreno pitanje da u prijedlog Budžeta uđe nabavka zemljišta u mjesnoj zajednici Podlugovi. Rekonstrukcija i investiciono održavanje cesta i mostova, ukupno 2.600.000 KM, gdje je naglašena izgradnja i rekonstrukcija trga ispred KSC-a u vrijednosti od 380.000 KM, gdje su naglašeni putni pravci koji će se finansirati iz OKFS-a. Također, imamo rekonstrukciju i održavanje zgrada, želimo prije svega još da završimo kada je ova zgrada u pitanju aola, da se izgradi lift, da započnemo sanaciju zgrade br.2, ulaza i haustora i da otvorimo i taj projekat koji će se za neko vrijeme u potpunosti završiti. Mi smo ovaj nacrt, od Kantonalnog Ministarstva za finansije dobili saglasnost, kao dokument koji ispunjava sve zahtjeve definisane zakonom o Budžetima Federacije BiH i predložili smo odluku o javnoj raspravi koja će trajati 15 dana, tako da do 15.12. dobijemo primjedbe na ovaj Budžet.

DAMIR FILIPOVIĆ - vijećnik SDP-a

Obzirom da smo se dotakli zakona, na prošloj sjednici sam postavio pitanje zašto nisu ispoštovani zakonski rokovi o Zakonu o Budžetu, smatram da je na taj način onemogućen transparentan rad odnosno transparentno učešće građana i organizacija u samom kreiranju nacrta Budžeta. Svjesni smo da sada građani imaju priliku da učestvuju na nacrtu, ali isto kroz ovu odluku povlači se pitanje zašto nema javne prezentacije iz tog nacrta, mislim da bi bilo poželjno da postoji javna rasprava nacrta Budžeta, isto kao što je bila potreba da se uključe sve mjesne zajednice da daju svoje prijedloge onako kako je određeno Zakonom o Budžetu Federacije BiH.

SEAD ŠEHIĆ – vijećnik SBB-a

Želio bih da napomenem jednu stvar u ovome Budžetu, većinom kakav Nacrt Budžeta bude takav i prođe kao konačno usvajanje Budžeta. Prije 2-3 sjednice, kad smo usvajali Regulacioni plan za Novo naselje načelnik i ostali iz općinske službe rekli su da treba malo više posvetiti pažnje prema Novom naselju, jer tu živi oko 1.070 stanovnika. Načelnik je maloprije naveo, da recimo u Dragoradima treba da se gradi sportska ploha, a gore je Regulacionim planom na jednom mjestu predviđena, a nigdje ne vidim da se općinska služba osvrnula na to pitanje. Zna se da su ulice tijesne, da se malo proširi, da se mogu auta mimoći, pa zbog toga pitam načelnika da li će se malo osvrnuti i na tu stvar?

BESIM GLJIVA – vijećnik Stranke za Srednje

Ne mogu a da ne pohvalim ovakvo nešto, ovo je u velikoj mjeri razvojni Budžet, općina Ilijaš ima jedan razvojni Budžet pogotovo u vremenu kada mnoge općine koje su u nekom prethodnom periodu bile daleko ispred nas već stagniraju i mnoge su iza nas po samoj visini Budžeta i realizaciji ovih projekata. Ovo govorim sa aspekta, obzirom da sam već dugo u ovim vijećničkim klupama i pamtim dosta. Načelnik je za neke Budžete dobijao i pohvale koliko se sjećam. Jedna od najdražih stavki u ovom Budžetu, prva jeste presuda zločincima što su htjeli uništiti državu i koji su krivi za mnoge stvari koje sam i lično prošao u ovom posljednjem ratu a druga jeste stavka o Budžetu od 1.000.000 KM za Vrutak. O Vrutku smo ovdje pričali nekih deset godina i do skoro je on izgledao kao jedna neostvorena želja i nemoguća misija. Međutim, ja se nadam da ćemo pokrenuti jedan od najbitnijih projekata za kompletno gornje područje općine Ilijaš a koje čini oko 60% teritorije, gdje je intezivirana gradnja, pogotovo širi plato Nišića. Mnogi ne znaju da zaštićeni pejzaž Bijambare bez ovog projekta je ništa, jer gore nema vode za širenje bilo čega. Vrutkom se pokriva kompletno gornje područje sa rezervama i za Srednje i za Ilijaš.

MUHAMED HANDŽIĆ – vijećnik BPS-a

Za prethodnu tačku sam imao nekoliko pitanja, ali može i kroz ovu tačku dnevnog reda da to provučemo, a radi se o slijedećem kao što reče kolega Besim, ovaj Budžet je impozantan. Međutim, postavlja se pitanje kolika će realizacija prethodnog biti do kraja godine, obzirom da je i on obiman. Bojim se da nećemo moći realizovati sve projekte koji su planirani obzirom da je građevinska sezona već završena, a realizacija Budžeta je već 60%, te nam preostaje još 40%, tako da bi planirali možda prenošenje sredstava iz prethodnog Budžeta na ovaj vjerovatno, po mojoj procjeni nekoliko miliona, a može biti i nekoliko stotina hiljada, ovaj Budžet može biti i još veći u ovoj konstalaciji realizacije Budžeta. Gledajući prijedlog, odnosno nacrt Budžeta, malo sam se zadržao kod transfera udruženja građana i taj transfer je iznosio tekuće godine 465.000 KM, da li je on opravdan u cjelosti, vidjet ćete na kraju kroz Strategiju mladih, a ovdje izdvajamo 155.000 KM za sportska udruženja, da nam se mladi zadržavaju najviše i da su na poligonima, kladionica u najvećoj mjeri. Pitam se kolika je opravdanost finansiranja ovih udruženja, pa i ratnih udruženja ako na obilježavanjima određenih događaja imamo 20-tak ljudi, to su uglavnom predstavnici tih udruženja ili i njih nema. Ja bih volio da se oni pojave kada bude prijedlog Budžeta i da me demantuju o svemu ovome što ja pričam i da ih pitam gdje su bili na svim obilježavanjima u tekućoj godini. Što se tiče transfera za Vodostan, možda tu treba povećati još Budžetsku stavku obzirom da izgradnjom nove ili obnavljanjem postojeće vodovodne mreže mi devastiramo dio ulica u Ilijašu i one će se morati sanirati i u tu svrhu

moramo planirati određena sredstva za sanaciju saobraćajnica, trotoara koji su u već velikoj mjeri oštećeni. Ako realizacija ovog narednog Budžeta bude 100% ja čestitam načelniku i njegovim službama.

SAUDIN DURMIĆ- vijećnik SDA

Čestitam načelniku na impozantnom Budžetu i na vođenju brige o svim sferama života na području naše općine Ilijaš. Nadam se da ćemo ovaj Budžet realizovati upotpunosti obzirom da je naša općina razućena i drago mi je da vidim kontinuitet u razvoju cijelog područja općine Ilijaš i poboljšanju uslova života za naše građane.

AKIF BEŠLIJA – vijećnik SBB-a

Impozantan je Budžet, ja se pridružujem čestitkama. Međutim, ono što sam na ovakvom Budžetu zapazio, ja sam već drugi mandat ovdje i ja pričam o sportskoj plohi odnosno igralištu u mjesnoj zajednici Mrakovo. Te aktivnosti smo počeli odavno, bilo je riječi o prikupljanju dokumentacije projekta. Apelujem, iako ćemo mi to napismeno dostaviti da se nađe mogućnost da se izgradi igralište koje godinama kasni a znate da je to u jednom od najvećih naselja, stoga načelnice ako je ikako moguće da se iznađu određena sredstva. Mislim da je taj projekat o kojem smo pričali, da su pozamašna sredstva, ali hajde da radimo etapu po etapu, da počnemo gore nešto raditi. Davno je kupljena zemlja od strane građana i da pređemo sada na aktivnosti kada je u pitanju općina.

MAHIR DEVIĆ – predsjedavajući

Pošto je nacrt, mi ćemo morati sjesti i dogovoriti se, pošto ima više zahtjeva o sportskim plohama a to su Podlugovi, Mrakovo a početo je nešto davno i na Gajevima da se radi jedna manja ali nije ni to urađeno i sada Ilijaš grad ima problem jer koristi ovu školsku plohu i sada toga ima jako mnogo. Teško je naravno sada staviti u Budžet pola miliona, ali bi trebali napraviti neku vrstu čestitog dogovora na nivou Vijeća i da stavimo neke prioritete a ne da dolazimo u situaciju da kandidujemo tri a objektivno treba da uradimo jednu kako treba, tako da vjerujem da će i načelnik malo to do prijedloga Budžeta vidjeti. Ima javna rasprava do prijedloga, pa što se može popraviti i popraviti ćemo. Pohvaljujem Budžet, da ovo Općinsko vijeće i politika radi na tome da Ilijaš svakog dana ide naprijed i da smo i mi jedan konstruktivni dio u svemu tome.

HALID DIZDAREVIĆ – vijećnik SDA

Želim da pohvalim nacrt Budžeta, dotaći ću se stavke vezane za sportska društva i udruženja. Imajući u vidu da neke evropske zemlje izdvajaju i 3% od ukupnog Budžeta za sport, mislim da je ova stavka mala, imajući u vidu koje rezultate sport daje. Jedno dijete koje se spasi i ne postaje delikvent i liši se poroka kao što su kladionice i slično. vrijedi ovih 155.000 KM, tako da do prijedloga Bužeta, predlažem da se ova stavka poveća i da se omogući razvoj sporta u Ilijašu.

AKIF FAZLIĆ – općinski načelnik

Koliko sam mogao registrirati, Damir je postavio tri pitanja. Pitanje Budžetskog kalendara, dakle ono je opravdano i do kraja oktobra bi trebalo usvojiti nacrt, ja ću reći šta je

objektivan razlog što cijenim da je bolje što smo išli ovako nego u oktobru, a to je ona stavka koju sam vam na početku rekao, da je od viših nivoa vlasti sada u nacrtu 5.160.000 KM, trećina sredstava koja su sada i kroz nacrt Budžeta i kroz neke odluke Vlade Federacije, tačno izdefinisane. Time značajno dajemo objektivnost ovom nacrtu, a mislim da smanjenje roka za javnu raspravu neće toliko ugroziti na kvalitetu te rasprave, jer ako mi želimo nju obaviti, nećemo jednu za drugom, ona se može istovremeno obavljati u svim političkim partijama, mjesnim zajednicama i drugim strukturama i da za 15 dana ona se može na kvalitetan način završiti. Drugo pitanje javne prezentacije ja prihvatam, da općina, načelnik i resorna služba napravi javnu prezentaciju, godinama smo prezentirali javno Budžet, ja to prihvatam i počet ćemo odmah iduće sedmice javnu prezentaciju. Kada je u pitanju učešće mjesnih zajednica, mi u proceduri donošenja Budžeta nekad u Budžetskom kalendaru u mjesecu avgustu, upućujemo dopise mjesnim zajednicama, tražimo od njih da kandiduju projekte, da ih po prioritetima naznačavaju i dostavljaju službi i time ih od početka uključujemo u ovaj proces. Ovdje imamo dva vijećnika koji su govorili o sportskim plohama, pitanje koje zavređuje da ovo Vijeće utvrdi priotitet izgradnje sportskih ploha na području općine Ilijaš, jer mi u idućoj godini osim ovoga, što smo Dragoradima dužni godinama ne možemo ozbiljnije obezbjediti dodatne novce pošto pokrećemo gradski stadion u vrijednosti od pola miliona. Još jedna ploha u 2018. godini da poredamo ostale i to na nivou sredstava kao što su Dragoradi da zaista gradimo i po kvalitetu i po sadržaju te plohe na puno ozbiljnijem nivou nego do sad, te da za prijedlog Budžeta napravimo taj prijedlog prioriteta i da ga Vijeće usvoji. Kada je u pitanju vodovod Vrutak, Besim kao vijećnik je uključen već godinama kad smo osmišljavali od ideje pa do trasa projekata, po meni jeste jedan od najznačajnijih projekata u idućoj godini. Realizacija Budžeta jeste dijelom i problem, nije jednostavno i ovogodišnji Budžet i idući su značajno veći od ranijih Budžeta i to traži veće kapacitete nas koji to provodimo i morat ćemo dati odgovor na to, osim onoga što su nekada duge procedure, osim što Kantonalna ministarstva ponekad razvuku potpisivanje sporazuma, ali ja mislim da ćemo mi sa zadovoljavajućim stepenom realizacije ovogodišnjeg Budžeta završiti ovu godinu i naravno da ćemo za prijedlog to morati unijeti i ono što eventualno ostane kao razgraničena sredstva bit će stavljenja u Budžet za 2018. godinu. Pitanje opravdanosti finansiranja sportskih udruženja i boračkih udruženja ja ovdje ne bih otvarao, svi mi imamo svoja mišljenja, ali moram reći da sportska udruženja i klubovi u Ilijašu rade i koje sportske rezultate postižu i u kojim ligama se takmiče i određeni pojedinačni rezultati tih sportista ipak zavređuju da budu adekvatno finansirani, naravno negdje gdje škripi, onda treba kroz neku odgovornost za izvršavanje planova to i sankcionisati. Boračka udruženja ostavili smo kako i jesu. Kada je u pitanju JKP Vodostan, mi smo još uvijek na nekom načinu ralizacije projekata da oni svoju infrastrukturu riješe, te da općina to poslije sanira, mada bi bilo logičnije da kroz isti projekat se sve riješi do kraja. To su modaliteti koje ćemo mi do kraja izdefinisati, ali u smislu da se to i sanira, odnosno da se vrati u prvobitno stanje.

DAMIR FILIPOVIĆ- vijećnik SDP-a

Obzirom da smo upoznati, da se poziv za javnu raspravu vrši putem našeg operatera, odnosno Radio Ilijaša i putem objavljivanja na našoj Internet stranici, zamolio bih da se i zaduži koordinator za mjesne zajednice, da pozove svakog predsjednika mjesne zajednice da na svako mjesto okači obavijest o javnoj prezentaciji Budžeta, da pokušamo što više da uključimo ljude, da ne bi kasnije bilo da se niko apsolutno nije odazvao na javnu raspravu kao što imamo i za Regulacione planove.

AKIF FAZLIĆ – općinski načelnik

Prihvatam amandman Damira Filipovića da se obavi javna prezentacija Nacrta Budžeta općine Ilijaš za 2018. godinu.

Diskutanata po ovoj tački dnevnog reda više nije bilo, pa je Općinsko vijeće jednoglasno donijelo

ZAKLJUČAK

Član 1.

Prihvata se Nacrt Budžeta općine Ilijaš za 2018. godinu i stavlja na javnu raspravu

Član 2.

Nacrt Budžeta općine Ilijaš za 2018. godinu stavlja se na javnu raspravu, kako slijedi:

- objavom putem web stranice općine Ilijaš
- javna prezentacija u sali Općinskog vijeća
- objavom na oglasnoj ploči općine Ilijaš

U javnoj raspravi učestvovat će: građani, javna preduzeća, javne ustanove, mjesne zajednice, budžetski korisnici, političke stranke i ostale asocijacije i udruženja građana.

Član 3.

Javna rasprava o Nacrtu Budžeta općine Ilijaš za 2018. godinu se određuje u trajanju od 15 dana, počev od 01.12.2017. godine.

Član 4.

Nakon provedene javne rasprave primjedbe i prijedloge će dostaviti Službi za privredu i finansije u pisanoj formi ili putem e-maila, najkasnije do 18.12.2017. godine do 12,00 sati.

Primjedbe i prijedlozi dostavljeni poslije navedenog roka neće biti uzete u razmatranje.

AD-5

Nacrt Odluke o izvršavanju Budžeta općine Ilijaš za 2018. godinu

Diskutanata po ovoj tački dnevnog reda nije bilo, pa je Općinsko vijeće jednoglasno donijelo

ZAKLJUČAK

Član 1.

Prihvata se Nacrt Odluke o izvršavanju Budžeta općine Ilijaš za 2018. godinu i stavlja na javnu raspravu

Član 2.

Nacrt Odluke o izvršavanju Budžeta općine Ilijaš za 2018. godinu stavlja se na javnu raspravu, kako slijedi:

- objavom putem web stranice općine Ilijaš
- javna prezentacija u sali Općinskog vijeća
- objavom na oglasnoj ploči općine Ilijaš

U javnoj raspravi učestvovat će: građani, javna preduzeća, javne ustanove, mjesne

zajednice, budžetski korisnici, političke stranke i ostale asocijacije i udruženja građana.

Član 3.

Javna rasprava o Nacrtu Odluke o izvršavanju Budžeta općine Ilijaš za 2018.godinu se određuje u trajanju od 15 dana, počev od 01.12.2017. godine.

Član 4.

Nakon provedene javne rasprave primjedbe i prijedloge će dostaviti Službi za privredu i finansije u pisanoj formi ili putem e-maila, najkasnije do 18.12.2017. godine do 12,00 sati.

Primjedbe i prijedlozi dostavljeni poslije navedenog roka neće biti uzete u razmatranje.

AD-6

Prijedlog Odluke kojom se daje saglasnost općinskom načelniku za sklapanje ugovora o osnivanju stvarne služnosti na poslužnoj nekretnini u korist titulara prava stvarne služnosti DD BH Telecom Sarajevo

Diskutanata po ovoj tački dnevnog reda nije bilo, pa je Općinsko vijeće jednoglasno usvojilo

Odluku kojom se daje saglasnost općinskom načelniku za sklapanje ugovora o osnivanju stvarne služnosti na poslužnoj nekretnini u korist titulara prava stvarne služnosti
DD BH Telecom Sarajevo

AD-7

Prijedlog Odluke o zonama sanitarne zaštite i zaštitnim mjerama za izvorište Junakovac

Predloženo je da pomoćnica načelnika u kompletu obrazloži tačku 7., 8., 9., i 10., a izvršit će se pojedinačno glasanje za svaku tačku.

MERIMA OSMANOVIĆ – pomoćnik načelnika

Predlagač ulaže amandman na ovu Odluku koji glasi:

U članu 7. navedene Odluke izvršiti sljedeće izmjene :

Dodaju se novi stavovi :

- Ograđivanje i zaštitne zone izvršiti do lokalne saobraćajnice, a koja prolazi kroz zaštitnu zonu.
- Izmještanje dionice saobraćajnice iz I zaštitne zone izvršit će se u roku od 2 (dvije) godine kako bi se upotpunosti uspostavila zaštita izvorišta u I zoni.

Dosadašnji stavovi (2) i (3) postaju stavovi (4) i (5)

Zaštita izvorišta Junakovac, vrši se uspostavljanjem i održavanjem zone sanitarne zaštite prema lokalnim uslovima i istražnim radovima i izvršenim prema elaboratu zaštita izvorišta Junakovac, čiji je obrađivač projekta AD Banja Luka, juli 2017. godine kao i provođenje zaštitnih mjera datih u ovom elaboratu a prema Odluci koje donosi Općinsko vijeće Ilijaš. Zone sanitarne zaštite Junakovac, utvrđuju se na osnovu člana 8. Pravilnika o načinu

utvrđivanja za uslove utvrđivanja zona sanitarne zaštite i zaštitnih mjera za izvorište vode za javno vodosnabdijevanje stanovništva ("Službene novine Federacije BiH, broj 88/12"), kojim su propisani uslovi za određivanje zona sanitarne zaštite i zaštitnih mjera izvorišta za vode za javno vodosnabdijevanje stanovništva. Kada je u pitanju izvorište Junakovac, elaboratom su utvrđene dvije zaštitne zone. Prva zaštitna zona, zona sa najstrožom zabranom i ograničenjima i druga zaštitna zona, zona sa strogim zabranama i ograničenjima. Prva zaštitna zona obuhvata prostor u neposrednoj zoni izvorišta Junakovac i unutar prve zaštitne zone mogu se nalaziti kaptažne građevine, rezervoari, pumpne stanice, prilazi i drugi objekti koji su neophodni za rad vodosnabdijevanja i područje prve zaštitne zone mora biti zaštićena od neovlaštenog pristupa, čvrstom i sigurnom obradom visine ne manje od 2 m kao i drugim mjerama fizičke zaštite i osiguranja. Pristup području prve zaštitne zone, dozvoljen je samo uposlenicima koje odredi operator vodovodnog sistema i nadležnim inspekcijskim organima za vrijeme vršenja kontrole kao i drugim licima uz posebnu dozvolu i evidenciju korisnika vodozahvatnih objekta. Operator vodovodnog sistema u našem slučaju JKP Vodostan mora na odgovarajući način obilježiti prvu zaštitnu zonu i istaći upozorenje o zabrani neovlaštenog pristupa.

Ja bih samo naglasila da Odluka o zaštiti izvorišta Sokolina-Srednje i izvorišta koja služe za snabdijevanje mjesne zajednice Kamenica tu se vrši usklađivanje sa novim pravilnikom, obzirom da su za ova dva nova izvorišta, Općinsko vijeće 2009. godine donijelo Odluku, samo vršimo usklađivanje sa novim odredbama pravilnika, a ove dvije druge odluke su odluke o zaštiti izvorišta Junakovac i izvorište za snabdijevanje naselja Kamenica – Donji Čevljanovići su nove ove odluke donesene u skladu sa odredbama Pravilnika za vodosnabdijevanje sa izvorišta i stanovništva ovih mjesnih zajednica.

RASIM ŠEHIĆ – vijećnik SDA

Pomoćnici načelnika bih sugerisao da ne usvojimo ovu Odluku, prije nego što napomenem da ovdje ima jedna greška tehničke prirode, vezane za Odluku o zaštitnim zonama Jasikovac-Kokočino vrelo. Ovdje u članu 1. stav 2. treba da stoji MZ Kamenica. Ova odluka donosi se u cilju zaštite pitkih podzemnih voda za naselja ne Srednje, jer je Sokolina u Srednjem, a ne MZ Kamenica.

BESIM GLJIVA – vijećnik Stranke za Srednje

Zanima me zašto, bez obzira što nam je poznato da vodozahvat Vrela nije pod ingerencijama još zvanično JKP Vodostan, nego djelimično, zašto on nije ovim obuhvaćen i ima li načina. Sjeća se vrši svake godine neposredno blizu izvorišta, kamenolom je bio blizu izvorišta, on je uz sami put i on je trenutno u takvom stanju, jer mi koji to održavamo nemamo adekvatnog načina da to održavamo. Zar nije bilo načina da u ovom paketu i ovo stavimo?

MERIMA OSMANOVIĆ – pomoćnik načelnika

Mi smo sa ovim paketom Odluka išli za ona izvorišta koja služe za vodosnabdijevanje ovih naselja iz razloga što su i ova izvorišta predana na upravljanje JKP Vodostan. Pored ovoga mi imamo u 2015. godini donesene dvije odluke, Odluka o zaštiti izvorišta Vrutak s ciljem definisanja prve zaštitne zone, u cilju otkupa zemljišta, obzirom da je izvorište bilo locirano na privatnom zemljištu. Također, 2015. godine donešena je Odluka o zaštiti

izvorišta koja služe za vodosnabdijevanje naselja Dragoradi. Ove 4 Odluke odnose se na izvorišta koja su u pretežnom i isključivom vlasništvu općine, a u skladu sa važećim pravilnikom, odluke o zaštiti izvorišta donose njihovi vlasnici, ali stojimo na raspolaganju da u nekom daljem periodu općina se uključi u izradi elaborata i za ovo izvorište. Ovo neka bude inicijativa, jer donošenju odluka prethodi izradi elaborata i ove Odluke su sastavni dijelovi elaborata o zaštiti izvorišta.

BESIM GLJIVA – vijećnik Stranke za Srednje

Ja sam zamolio da ako postoji mogućnost da mi kažete koliki je to naredni period? Izvorište o kojem ja govorim od većine ovdje koje smo nabrojali, snabdijeva veći broj stanovnika i tvrdim odgovorno da je bilo važnije zaštititi ovo izvorište Vrela nego većinu ovih koje smo nabrojali. Ja ne znam koliko košta elaborat ali ja samo napominjem da je bilo neophodno zaštititi jer se nalazi na takvoj lokaciji. Izvorište o kojem ja govorim, ne govorimo o kompletnom sistemu, govorim o izvorištu Vrela i ono je isključivo finansirano iz Budžeta općine i nevladine organizacije.

MUHAMED HANDŽIĆ – vijećnik BPS-a

Isto pitanje koje je postavio kolega Besim, odnose se na dva vodozahvata u Bioči. Imamo sto domaćinstava koja koriste ova dva vodozahvata, a nisu zakonski zaštićeni. Pored toga, imamo osnovnu školu gdje djeca konzumiraju tu vodu i niko ne odgovara da se bilo šta desi, trovanje ili sličan oblik zaraze. Potrebno je napraviti jedan obuhvat zaštite.

MIRSAD OSMANOVIĆ – vijećnik SDP-a

U prošlom Vijeću da ste ovo odradili jer je bila zakonska obaveza, zato sada odgovornost snosi prvo općinski organ, zatim vijećnici. Drago mi je kada na dnevni red dolaze i rješavaju se osjetljiva pitanja. Uvažavam što kolege govore, ali moramo poštovati zakon, ne smijemo kasniti 4 godine, mnoge stvari bi bile regulisane i bilo bi nam lakše. Također, imam pitanje je li nacrt elaborata, govorim o usklađivanju, je li provedena javna rasprava, je li isti taj elaborat zaštite poslat na mišljenje i uvid jedinicama lokalne samouprave, mjesnim zajednicama? Godine 2009. kad smo imali stare Odluke, što se tiče finansiranja, ista je zakonska, ne vidim ni u jednoj odluci da se mora obezbjediti i prema Zakonu o vodama i pravilniku na koji se pozivate, 10 godina moramo vidjeti u ovom dokumentu, obezbjeđeno finansiranje održivosti zaštitnih zona.

MUHAMED HANDŽIĆ – vijećnik BPS-a

Ja moram kolegi Osmanoviću napomenuti da on nije bio u prošlom sazivu Vijeća i da sam ja postavio ovo pitanje, a da ga uvjerim na slijedeću sjednicu donijet ću i u kojem periodu sam postavio ovo pitanje na ovom Vijeću.

AKIF FAZLIĆ – općinski načelnik

Ispade neki negativan kontekst što smo danas predložili četiri Odluke. To su procedure, pravilnici, zakoni, elaborati koje vi niste ni vidjeli, ovo su samo Odluke koje su došle. Uradili smo vrlo značajan dio posla, riješili smo pitanje vodozahvata koji su dati na upravljanje našem JKP Vodostan. Ja sada neću da govorim o obavezama vlasnika

vodovoda, da se tako ponašaju, pa tako i mom prijatelju Besimu, da se ponaša kao vlasnik vodovoda i da odgovara za status izvorišta Vrela, jer se jako dobro razumijemo i ne treba on da odgovara, ali obzirom da se razumijemo treba da napravimo strategiju da sva izvorišta koja nisu predata na upravljanje da radimo elaborate, da jedno po jedno rješavamo. To su veliki poslovi i procedure, prihvatam inicijativu da krenemo sa ostalima, a mislim da smo mi u nacrtu već stavili stavku koja znači troškove za slijedeću godinu kada su u pitanju ove zaštitne zone.

Diskutanata po ovoj tački dnevnog reda više nije bilo, pa je Općinsko vijeće jednoglasno usvojilo

Odluku o zonama sanitarne zaštite i zaštitnim mjerama za izvorište Junakovac

AD-8

Prijedlog Odluke o zaštitnim zonama i zaštitnim mjerama izvorišta
15. "Sokolina"-Srednje, općina Ilijaš

Diskutanata po ovoj tački dnevnog reda nije bilo, pa je Općinsko vijeće jednoglasno usvojilo

Odluku o zaštitnim zonama i zaštitnim mjerama izvorišta
"Sokolina"-Srednje, općina Ilijaš

AD-9

Prijedlog Odluke o zaštitnim zonama i zaštitnim mjerama izvorišta "Crepala" i "Ajkunino vrelo"

Diskutanata po ovoj tački dnevnog reda nije bilo, pa je Općinsko vijeće jednoglasno usvojilo

Odluku o zaštitnim zonama i zaštitnim mjerama izvorišta "Crepala" i "Ajkunino vrelo"

AD-10

Prijedlog Odluke o zaštitnim zonama i zaštitnim mjerama izvorišta
"Jasikovac" i "Kokočino vrelo", MZ Kamenica, općina Ilijaš

Diskutanata po ovoj tački dnevnog reda nije bilo, pa je Općinsko vijeće jednoglasno usvojilo

Odluku o zaštitnim zonama i zaštitnim mjerama izvorišta
"Jasikovac" i "Kokočino vrelo", MZ Kamenica, općina Ilijaš

Uslijedila je pauza od 11:45 -13:00h

AD-11

Prijedlog Odluke o davanju saglasnosti za dodjelu koncesije za izgradnju
hidroenergetskog objekta na području općine Ilijaš-mHE Podlugovi

AKIF FAZLIĆ – općinski načelnik

Mi smo već na nekoliko sjednica Vijeća u toku ove godine otvorili pitanje koncesija i davanja saglasnosti na koncesije kao osnovnog preduvjeta u vođenju procesa prolaska

koncesionih ugovora a za ovu vrstu koncesije je nadležan kantonalni nivo vlasti, odnosno Kanton Sarajevo, odnosno Ministarstvo privrede Kantona Sarajevo. Ova godina je zaista bila jako pozitivna sa aspekta zainteresiranosti potencijalnih investitora koji su željeli da uđu u procese eksploatacije prirodnih resursa, pa prema tome eksploatacije vodnog resursa i Kolegij Općinskog vijeća, širi kolegij, političke stranke su upoznate sa ovim idejama, imali smo zajedničke sastanke, zajedničke prezentacije projekata i ono što je najvažnije na tim vrstama sastanaka napravili jedan opšti konsenzus koji znači da općina Ilijaš želi podržati ovakve vrste investicija. Naravno, pod uvjetima koje su u interesu stanovništva ove općine i u interesu generalno lokalne zajednice. Na bazi svega ovoga izdefinisani su neki subjekti koji nisu prošli proceduru onoga što smo mi tražili kao neke limitirajuće faktore koji se riješe s tog aspekta, zahtjev firme Saten nije prošao ono što mi kao uslove stavljamo i to imamo u članu 2. ove Odluke. Dakle, ostao je zahtjev za mini hidroelektranu Podlugovi i mini hidroelektranu Ljubnići firme Internacional Sarajevo i na bazi onoga što je prezentirano širem Kolegiju Općinskog vijeća, procijenjeno je da su ovo jako prihvatljivi programi. Kada govorimo o prihvatljivim programima ja prije svega želim gledati na važnost tih projekata sa aspekta povećanja nacionalnog bruto proizvoda, sa aspekta povećanja kapaciteta izvoza, znamo da je struja jedna od roba koja se najviše izvozi, sa aspekta novih investicija, sa aspekta nekog koji će donijeti jedan novi dodatni imidž općini Ilijaš, kao općini gdje investitori nailaze na jedno povoljno okruženje, ali naravno bit ćemo rigorozni u ispunjavanju zahtjeva koje ovo Vijeće postavlja pred te investitore i ovi zahtjevi su pomalo prošireni u odnosu na postojeće zakone o koncesijama. Kada smo tražili i finansijske uplate kao nešto što se zove prijateljsko okruženje i kao nešto što se zove procjena firme koje žele ovdje investirati, mislim da smo sa investitorom ovo prilično izdefinisali i očekujem da ćemo mi danas donošenjem ove odluke ostaviti investitora u poziciji da li on prihvata ovo ako prihvata onda se nastavlja procedura. Također želim kazati da sa aspekta ozbiljnosti ove firme, ona svojim referensama pokazuje ozbiljnost sa aspekta visine kapitala koji je registriran u toj firmi, sa aspekta djelatnosti koje obavlja i po meni sa aspekta prihvatanja ovakvih uslova kao što smo mi dali i ono što je najvažnije jedan već duži period i mislim da je Ministarstvo privrede Kantona Sarajevo produžilo rok sa aspekta prikupljanja sve potrebne dokumentacije a čini mi se da im je u ovoj fazi potrebna 22 dokumenta, da su prikupili 20 dokumenata i da je ostala saglasnost još Općinskog vijeća i jedan ili dva dokumenta i time će zaokružiti dokumentaciju i ako bude potpuna i onako kako to zakon procjenjuje ući će se u fazu pregovaranja. Komisije za koncesije će sa investitorima pregovarati i napraviti osnovne elemente za koncesioni ugovor. Kada govorim o komisijama, po kantonalnom Zakonu o koncesijama općina daje svog člana u komisiju za koncesije, tako da kroz taj način ćemo pratiti proces a naravno kada dođe do građevinskih dozvola ako se eventualno ne budu ispunjavali ovi uslovi kako smo mi to postavili imamo mehanizme da napravimo ovo onako kako ova lokalna zajednica želi i da to bude ono što će donositi profit budućem investitoru. Iskazana je spremnost da se stane iza ove Odluke i da pratimo realizaciju investicije do kraja. Time ću završiti i predložiti da nam predstavnik projektantske kuće prezentira projekat i da nastavimo dalju raspravu.

EDHEM BIČAKČIĆ – predstavnik projektantske kuće

Predlagač je ujedno obrazložio tačku 11. i 12. dnevnog reda.

Ispred projektantske kuće, koja je radila idejni projekat ove dvije male hidroelektrane pokušat ću da vas u kratkim crtama upoznam. Male hidroelektrane spadaju u resurs

obnovljive energije i to je ono što evropska zajednica potencira da se u BiH razvije u narednom periodu. Pored malih tu su i velike hidroelektrane, vjetroparkovi i solarna energija, to na globalnom planu doprinosi smanjenju emisije CO₂, ublažavanju klimatskih promjena i svih onih negativnih efekata koje proističe iz zagađenja okoline, iz povećanja i zagrijavanja zemlje globalno. BiH u tom kontekstu je preuzela određene obaveze da 40% proizvodnje električne energije iz obnovljivih izvora sada i da taj trend u budućnosti treba brzo da se smanjuje udio termoelektre odnosno proizvodnje iz uglja. Na tom fonu sada, do 2005. godine u BiH je izgrađeno oko 80 malih hidroelektrana, oko 100 MW instalisati kapaciteti su ukupno. U malim hidroelektranama najveći broj ovih objekata izgrađen je u Srednjobosanskom kantonu, Zeničko-dobojskom kantonu, Goraždanskom kantonu, te Hercegovačko-neretvanskom. Sarajevski kanton je kasnio sa ovim aktivnostima, resursi koji su na ovom kantonu nisu tako izdašni kao u drugih, pa bi ovo u oblasti hidroenergije bila prva koncesija koja bi išla na putu dodjele. Danas se u kantonu dodjeljuje prva koncesija za vjetropark u općini Hadžići i na prevoju Ivan Sedlo, po nekoj proceduri ako vaša Odluka bude pozitivna onda bi ovo bio drugi projekat u kantonu koji bi se raspravljao, odnosno dva projekta u segmentu hidroenergije. Rijeka Bosna njen proticaj i hidrologija je poznata. Postoje vodomjerne stanice i ova voda mjeri se od austrougarskog perioda, tako za istraživače to je jedna olakšica i ima dugi statistički niz koji pokazuje sve te anomalije godišnje u smislu velikih i malih voda i sve je to ovdje uzeto u obzir. Također, prethodna vodoprivredna osnova BiH, koja je urađena prije 1990. godine, predviđala je ove lokacije ali one tada nisu bile interesantne za elektroprivrede jer se radilo o malim objektima, dakle radi se o malim hidocentralama, protočnim i to što se zove akumulacija to i nije akumulacija, nego stvaranje zagata da se na padu od 8 m omogući rad turbina. Ovo neće biti naše prvo druženje sa vama, ako ova procedura bude dalje napredovala onda ćemo imati javnu raspravu oko okolinske dozvole, te energetske dozvole, još najmanje dva puta ovdje ćemo prezentirati detalje ovoga projekta. Ovo je uslov da bi Kantonalna Vlada proglasila javni interes i otvorila pregovore o uslovima koncesije. Na tom putu ima još niz dokumenata koje je investitor prikupio i vjerujem da će zahtjev ubrzo biti kompletiran. Srednji godišnji proticaj na ovom lokalitetu, nizvodno od Ilijaša pa do granice sa općinom Visoko, prepoznate su i izabrane dvije mikro lokacije, mi smo ih nazvali Podlugovi i Ljubnići. Srednji proticaj vode na ovom profilu je 35 kubika, a centrala se instalira za 51 kubik, ovo je srednja godišnja voda a ona može za 50% više i to je jedan standard po kojima projektanti određuju ove objekte. Nekada je to mogla i puta dva da se instalira, a to je za velike akumulacije. Raspoloživi bruto pad u Podlugovima iznosi 8,5 m brana može biti visoka 9 m u odnosu na postojeći nivo vode to je otprilike manje dva metra i toliko se skida riječnog nanosa da bi ona bila stabilna i još dublje do čvrste podloge. Za turbine su izabrane S - Kaplan turbine, to je najnovija tehnologija i sada se u Bosni ova vrsta turbine proizvodi u Banovićima, a prve turbine idu na rijeku Praču ove izvedbe što se sada radi a mi ćemo ukoliko ubjedimo investitora nastojati da i ovdje bude taj domaći proizvod. Pored turbina tu je hidromehanička oprema, grube fine rešetke, zatvarači, čistilice, te ostala oprema kao i kompletni građevinski radovi, armiranje, armatura, iskopi i ono što treba oko same lokacije brane. Elektrana je projektirana tako da ostane u koritu Bosne, da zahvati izvan vodoprivrednog područja budu minimalni i da istovremeno uz izgradnju brane ide uređenje ovih obala, jer to se mora uraditi zbog same centrale i bit će potrebno negdje mali nasip staviti i sl. stvari pod realizacije detalja projekta to će biti detaljno iscrtano i usaglašeno. Projekat je prvo rađen na kartama Federalne geodetske uprave a zatim smo radili i ažurnu geodetsku podlogu sa geodetima općine Ilijaš koji su ucrtaali svo postojeće stanje na ovom području, jer u odnosu na one karte iz geodetske uprave desile su se ovdje niz aktivnosti tako da neće biti nekih nepoznatih iznenađenja. Ova centrala

Podlugovi je snage 3,8 MW i ona je u kategoriji malih elektrana, ona bi godišnje u prosječnoj hidrološkoj procjeni proizvela 18.000.000 KW h električne energije, kvota gornje vode data je 439,5 l, donja voda 431,20 l i ukupna cijena je 16.000.000 KM da se projektuje, izgradi i pusti u pogon ovaj objekat. Investitor Sarajevo Internacional d.o.o raspolaže kapitalom da može realizovati ovu investiciju, bit će tu i bankarska podrška kao što se realiziraju ovi projekti, ali on je potentan u smislu da može obezbjediti i učešće i pokriće za banku u svemu što je neophodno. Što se tiče druge elektrane Ljubnići, ona je nizvodno, tu je snaga 4,2 MW, razlika je jedino što je pad 9 m, snaga je jednaka proizvodu količine vode pada i još određeni koeficijent. Koncept je isti, S-Kaplan turbine, također ponovo uređenje obala duž čitavog prostora gdje se voda umiruje. Vi ste dobili našu prezentaciju gdje je to lokacijski precizno prikazano i dali smo sve tehničke parametre oko toga, ja ću saslušati vaša pitanja koja budu postavljena i potrudit ću se da vam odmah i odgovorim.

MIRSAD OSMANOVIĆ – vijećnik SDP-a

Kao što je načelnik rekao, mi smo prihvatili iz jednog razloga, zato što vjerujemo stručnjacima da ove elektrane imaju veoma mali ili skoro nikakav uticaj na okolinu. Što se tiče našeg Kluba jedino nas interesuje garancija da je ekološki prihvatljiv protok i da osigurava očuvanje prirodne ravnoteže. Tačka 2. i karakteristike akumulacije da li su saglasni, ovo što kaže gospodin Bičakčić, stručnjaci su mjerili sve, ali meni logike nema oko 4,5 km je dužina akumulacije ove dvije elektrane. Ovo ne govorim da se protivim, nego ovo što smo mi u tački 2. zadali ono što mora da se ispuni i ove karakteristike akumulacije sumnjam jesu li u saglasnosti. Širina pojasa koja je ovdje u karakteristikama i ono što smo mi zadali i ono što se ne smije dirati. Što se tiče ostalih komponenti, ako bude ovo što su prezentirali, meni je drago se taj prostor uredi, ja sam predložio da se smanje na godinu, ali nisu i to prihvatamo. I još jedno pitanje, može li se Kaplanova turbina nazvati Francisova turbina pa neka ostane isti broj lopatica?

MUHAMED HANDŽIĆ – vijećnik BPS-a

Klub BPS-a će u potpunosti podržati ovu Odluku kako je koncipirana od strane našeg načelnika, jer smo već imali prethodno konsultacije ovdje i nismo imali nekih primjedbi ili novih zahtjeva u odnosu na ono što je koncipirano kao uslovi investitoru koji dolazi na našu općinu. Dobro nam došli, investirajte a mi ćemo uraditi sve da vas bude što više.

SAUDIN DURMIĆ – vijećnik SDA

Mi u klubu SDA smo raspravljali o ovim saglasnostima i drago nam je da se ovakvi projekti dešavaju na području općine Ilijaš. To su projekti koji će nam donijeti novu vrijednost i nadamo se iskreno da će investitor urediti to područje. Bio sam igrom slučaja sudionik, izgradnje jedne mini hidriocentrale u Goraždu i mislim da je prva u BiH, onim što su tamo investitori uradili to je za svaku pohvalu. Klub SDA će podržati ovu Odluku, imamo toliko mehanizama da ispratimo sva buduća dešavanja.

EDHEM BIČAKČIĆ – predstavnik projektantske kuće

Što se tiče ekološki prihvatljivog protoka, to je zakonska obaveza i digitalni monitoring postoji i vodoprivreda je ta koja to nadzire. Pošto je ovo protočna elektrana, ne postoji

mogućnost zadržavanja nekih većih količina vode jer će se ona prelići preko brane. Ovdje tehnički minimum, ekološki minimum neće biti nikakav problem, on može biti problem kod malih vodotokova i tamo gdje praktički preko ljeta i protok je manji od ekološkog prihvatljivog toka, ovdje je rijeka Bosna sa svojih 35 kubika i neće biti ugrožen taj protok a ne postoje ni tehničke mogućnosti kada biste ih sve zaustavili za 4-5 sati voda bi išla preko brane. Tako da ne postoje ni tehničke mogućnosti da se to desi. Što se tiče dužine akumulacije, radi se o dvije akumulacije, mi smo dali u ovom materijalu dužina 2,8 km a širina je 65 m, ovo je prosječna širina na mjestima gdje je šira mogu biti nasipi, ti detalji nisu razrješeni, ali će se uklopiti zajedno sa općinskim geometrima. Mi bi jako voljeli da ovdje može doći Francisova turbina jer je jeftinija. To je tehnički zahtjev, ovdje mogu doći samo Kaplan turbine one se primjenjuju do 20 m pada, da je 18 m mogla bi ona. Ovdje trenutno može vertikalni Kaplan ili S-Kaplan, S-Kaplan je novija tehnologija i išli smo na to da bude što bolja i novija tehnologija. Što se tiče vertikalne Kaplan turbine, ona je klasična rješenje, pogotovo ako ta turbina može biti bosanski proizvod, u tehnološkom smislu to je danas koliko je meni poznato najveći proizvod koji BiH samostalno pravi i prodaje u svijetu.

Diskutanata po ovoj tački dnevnog reda više nije bilo, pa je Općinsko vijeće jednoglasno usvojilo

Odluku o davanju saglasnosti za dodjelu koncesije za izgradnju hidroenergetskog objekta na području općine Ilijaš-mHE Podlugovi

AD-12

Prijedlog Odluke o davanju saglasnosti za dodjelu koncesije za izgradnju hidroenergetskog objekta na području općine Ilijaš-mHE Ljubnići

Diskutanata po ovoj tački dnevnog reda nije bilo, pa je Općinsko vijeće jednoglasno usvojilo

Odluku o davanju saglasnosti za dodjelu koncesije za izgradnju hidroenergetskog objekta na području općine Ilijaš-mHE Ljubnići

AD-13

Prijedlog Odluke o izmjeni i dopuni Odluke o dodjeli mandata za članove Savjeta mjesnih zajednica na području općine Ilijaš

Diskutanata po ovoj tački dnevnog reda nije bilo, pa je Općinsko vijeće jednoglasno usvojilo

Odluku o izmjeni i dopuni Odluke o dodjeli mandata za članove Savjeta mjesnih zajednica na području općine Ilijaš

AD-14

Prijedlog Odluka o

- a) usvajanju Regulacionog plana "Gornji Kadarići"-Ilijaš
- b) provođenju Regulacionog plana "Gornji Kadarići"-Ilijaš

Diskutanata po ovoj tački dnevnog reda nije bilo, pa je Općinsko vijeće većinom glasova

usvojilo

Odluke o

- a) usvajanju Regulacionog plana "Gornji Kadarići"-Ilijaš
- b) provođenju Regulacionog plana "Gornji Kadarići"-Ilijaš

AD-15

Prijedlog Odluka o

- a) usvajanju Izmjena i dopuna Regulacionog plana "Luke"-Ilijaš (skraćeni postupak)
- b) provođenju Izmjena i dopuna Regulacionog plana "Luke"-Ilijaš (skraćeni postupak)

MUHAMED HANDŽIĆ – vijećnik BPS-a

Ovdje donosimo Odluku o usvajanju Izmjena i dopuna Regulacionog plana i ja kao vijećnik želim da znam o kakvim se izmjenama radi o kakvim se dopunama radi, zbog toga želim objašnjenje. Kada bi me sutra građanin Luke pitao o kakvim ste vi Izmjenama i dopunama odlučivali ja ne znam. Zbog toga, želim da mi se prikaže postojeće stanje, te da mi se prikaže stanje Izmjena i dopuna.

MELIHA AVDIBEGOVIĆ – pomoćnik načelnika

Mi smo po starom Zakonu bili izvršili korekciju ovog Plana, u međuvremenu je usvojen novi Zakon o prostornom uređenju, ministar nije dao saglasnost i išli smo, obzirom da postoji mogućnost u skraćenom postupku izmijeniti Plan iako se bitno ne mijenja sama koncepcija plana može ići izmjena i to po skraćenom postupku koji se donosi u roku od 90 dana. Ona je išla ovako brzo zbog toga što smo mi već imali spremnu Odluku i već je bio urađen Plan, samo je procedura promijenjena. Ovo je još uvijek prva faza realizacije industrijske zone Luka. Na ovom lokalitetu što je označeno plavom bojom na karti ovom izmjenom, isti ovakav kao dole put bio je odozgo prilaz parcelama, trenutno su dvije parcele, a bilo je planirano šesti i iz tih razloga je morala ta saobraćajnica, da bi se pristup tim bočno od postojećeg puta koji je izgrađen pristupilo. Mi smo sada umjesto šest planirali tri parcele, tako da će one imati direktan pristup sa već izgrađene saobraćajnice u industrijskoj zoni. To je bio zahtjev vlasnika parcela da im se ukine ta saobraćajnica na osnovu kojeg su oni dobili više tog slobodnog zemljišta.

MUHAMED HANDŽIĆ – vijećnik BPS-a

Radi se samo o Izmjenama na osnovu integracije ovih parcela, od šest tri, te Izmjeni koja se odnosi na ukidanje saobraćajnice. To je bitno iz tog razloga što ljudi pitaju a mi ne znamo.

Diskutanata po ovoj tački dnevnog reda nije bilo, pa je Općinsko vijeće jednoglasno usvojilo

Odluke o

- a) usvajanju Izmjena i dopuna Regulacionog plana "Luke"-Ilijaš (skraćeni postupak)
- b) provođenju Izmjena i dopuna Regulacionog plana "Luke"-Ilijaš (skraćeni postupak)

AD-16

Prijedlog Odluka o:

- a) usvajanju Izmjena i dopuna Regulacionog plana "Centar Ilijaš" (skraćeni postupak)
- b) provođenju Izmjena i dopuna Regulacionog plana "Centar Ilijaš" (skraćeni postupak)

MELIHA AVDIBEGOVIĆ – pomoćnik načelnika

Ja sam i prošli put objašnjavala što se tiče Izmjene u Regulacionom planu Centra. Odnosi se na postojeću nekadašnju direkciju Željezare koja je kupljena, bila je ona planirana ovim Regulacionim planom, bila je planirana na povećanje određenih gabarita. Novi vlasnik se izjasnio i dostavio idejno rješenje ali sve je u okviru svoje parcele. Ta parcela je nešto malo povećana, povećani su horizontalni gabariti u jednom dijelu. Bila je ona planirana 5+6 ali samo na malom dijelu planirana je 5+8. Radi se o stambenom a najvećim dijelom poslovnim objektu, to je Izmjena i tiče se povećanja horizontalnih i vertikalnih gabarita ali sve u vlasničkoj parceli.

Diskutanata po ovoj tački dnevnog reda više nije bilo, pa je Općinsko vijeće jednoglasno usvojilo

Odluke o

- a) usvajanju Izmjena i dopuna Regulacionog plana "Centar Ilijaš" (skraćeni postupak)
- b) provođenju Izmjena i dopuna Regulacionog plana "Centar Ilijaš" (skraćeni postupak)

AD-17

Prijedlog Odluka o:

- a) usvajanju Izmjena i dopuna Regulacionog plana "PDI BOSNA" (skraćeni postupak)
- b) provođenju Izmjena i dopuna Regulacionog plana "PDI BOSNA" (skraćeni postupak)

MELIHA AVDIBEGOVIĆ – pomoćnik načelnika

Ovdje je isto naš vlasnik firme Kondisa u okviru Regulacionog plana PDI kupio parcelu i sada je ona isto tako preparcelisana prema njegovim potrebama. Postojećim Regulacionim planom bio planiran jedan objekat. Njegov postojeći objekat je uz ovu Izmjenu. On želi da umjesto jednog objekta gradi dva i on je sada tako i planiran. Jedina je to sada Izmjena, da umjesto jednog grade se dva objekta shodno svojim potrebama i investicijama.

MUAMER DERVIŠEVIĆ – vijećnik SDA

Samo bih sugerisao Službi čiji je inicijator odnosno izrađivač ovog Regulacionog plana da prilikom Izmjene Regulacionog plana "PDI Bosna" zaista vodimo računa i sugerišemo privrednim subjektima da obezbjede unutar svog prostora parking za svoje uposlenike, obzirom da znamo da zakonom proizvodni pogoni moraju imati na sto kvadrata

proizvodnog pogona jedno parking mjesto. Sada se dešava da u Starom Ilijašu imamo često blokadu saobraćaja zbog uposlenika tih firmi koji parkiraju uz samu saobraćajnicu u Starom Ilijašu.

Diskutanata po ovoj tački dnevnog reda nije bilo, pa je Općinsko vijeće jednoglasno usvojilo

Odluke o

- a) usvajanju Izmjena i dopuna Regulacionog plana "PDI BOSNA" (skraćeni postupak)
- b) provođenju Izmjena i dopuna Regulacionog plana "PDI BOSNA"(skraćeni postupak)

AD-18

Prijedlog Odluke o pristupanju izradi Izmjena i dopuna Regulacionog plana Banovac

MELIHA AVDIBEGOVIĆ – pomoćnik načelnika

Ovaj postupak Izmjene i dopuna Regulacionog plana Banovac to je lokalitet ulice Hašima Spahića do zaključno sa potokom Gnionica koji veže uz naselje Podlugovi. Ovo je shodno novom zakonu o prostornom uređenju, pokrećemo i donosimo Odluku o pristupanju izradi Izmjena i dopuna Regulacionog plana, koja znači da će se provesti postupak Izmjena i dopuna plana isto kao i postupak za donošenje plana. Ovaj postupak nije po skraćenom, nego ide u redovnu proceduru. Mi smo zahtjev išli na cijeli lokalitet i ovdje će biti od koncepta nacрта uključene javnosti nekoliko puta uzet je u obzir izmjene cijelog lokaliteta, a najviše će se izmjena i ono što je potreba i što je ukazano kao potreba desit će se na lokalitetu našeg stadiona. Obzirom da je on sadašnjim planom umanjen, zato što je ova saobraćajnica koja bi vezala naš Centar i Podlugove išla ispod stadiona, pokušat ćemo da se sada vidi mogućnost zadržavanja sadašnjeg stanja stadiona i čak da se na određenim dijelovima proširi, obzirom da je na tom lokalitetu kupljena određena površina zemljišta. Određene intervencije trebale bi da se dese na lokalitetu gdje je započeta izgradnja stambenih kolektivnih objekata, smatramo da postoji potreba i naša je inicijativa bila da se taj lokalitet gdje je sada predviđen bazen i poslovni centar i jedna podzemna garaža za koju smo mi dva ili tri puta raspisivali javni poziv, nismo imali ni jedne prijave za izgradnju do sad. Želimo na način da se buduća izgradnja stambenih kolektivnih objekata desi tako da se u podrumima ili suteranima planiraju garaže u svim objektima, te u svim mjestima gdje bude bilo mogućnosti i da se umjesto ovih bazena, poslovnih objekata i sl. proširi stambena kolektivna izgradnja, obzirom da je to za sad nekako jedini prostor za širenje grada kada je u pitanju ova vrsta gradnje. Svakako postoji još nekih manjih intervencija na ovim prostorima, što ćete imati prilike svakako da učestvujete u kreiranju ali i usvajanju.

Diskutanata po ovoj tački dnevnog reda više nije bilo, pa je Općinsko vijeće jednoglasno usvojilo

Odluku o pristupanju izradi Izmjena i dopuna Regulacionog plana Banovac

AD-19

Prijedlog rješenja iz imovinsko-pravne oblasti broj: 06/1-31-2388/17

Diskutanata po ovoj tački dnevnog reda nije bilo, pa je Općinsko vijeće jednoglasno usvojilo

Rješenje iz imovinsko-pravne oblasti broj: 06/1-31-2388/17

SANJA ZAGORAC-JOZIĆ – pomoćnik načelnika

U skladu sa članom 11. Zakona o mladima Federacije BiH, zakon nalaže da svi nivoi vlasti u Federaciji BiH moraju donijeti strateške dokumente koji utvrđuju politike prema mladima. Općina Ilijaš je u saradnji sa omladinskom organizacijom "Carpe diem" utvrdila i izradila nacrt ovog strateškog dokumenta. Drago mi je da su ovu Strategiju uradili mladi Ilijaša, koji prema zvaničnim statističkim podacima aktuelnog posljednjeg popisa iz 2013. godine, čine 23% populacije općine Ilijaš, odnosno 4.458 mladih ljudi u starosnoj dobi od 15-30 godina. Izradi ovog dokumenta prethodilo je istraživanje koje je provedeno u jesen 2015. godine, istraživanje, položaj i potreba mladih na području općine Ilijaš. Istraživanje se provelo na osnovu posebno struktuiranog upitnika koji je sadržavao 196 pitanja. Ispitivanjem je obuhvaćeno 117 ispitanika, mada su ove anketne upitnike preuzeo veći broj mladih, ali nažalost nisu svi dostavili odgovore na postavljena pitanja. Radilo se o relevantnom uzorku na kojem su mogli da budu utvrđeni ovi strateški pravci. Praktično, bili su obuhvaćeni mladi sa čitavog područja općine Ilijaš, različite socijalne strukture, obrazovne, oni koji su u procesu redovnog obrazovanja, oni koji su završili svoje obrazovanje, nalaze se na evidenciji Službe za zapošljavanje ili su zaposleni. Ovi podaci su relevantni i mislim da su mogli na osnovu analize dati osnovne preporuke za općinske politike u radu sa mladima za naredni period od 5 godina. Kao rezultat istraživanja, urađena je analiza koja je dala 18 preporuka aktuelne politike a nakon toga prezentirana je analiza u Komisiji za mlade i obrazovanje Općinskog vijeća Ilijaš gdje je prihvaćena sa odobravanjem. Nakon toga ona je prezentirana na našim portalima, mladi Ilijaša su mogli imati uvid u rezultate istraživanja, a nakon toga je općinski načelnik u julu 2017. godine, formirao radnu grupu za izradu ovog strateškog dokumenta koja je imala sedam radnih tijela po različitim oblastima. Koordinator izrade ove strategije je bila Enisa Mešetović kojoj se zahvaljujem na uloženom trudu, sistematičnosti prije svega strpljenju sa radom sa radnim grupama. Imali smo odziv koji u svim grupama nije bio onakav kakav smo očekivali, ali ona je uspjela da se iznese sa svim tim problemima, kao rezultat njenog rada imamo ovaj jedan dokument koji zavređuje našu pažnju. U ovoj uvodnoj riječi mogu reći da smo uspjeli da napravimo analizu trenutnog stanja na području općine Ilijaš, da izdvojimo neke aktuelne probleme i damo prijedloge za izradu Akcionog plana. Mislim da će u ovoj javnoj raspravi koja će trajati 15 dana, u kojoj će učestvovati omladinske organizacije, politički subjekti, te svi zainteresovani građani i mladi općine Ilijaš moći dati kvalitetne prijedloge, primjedbe, sugestije koje bismo mi uvrstili u prijedlog dokumenta. Moram istaći da Komsija za Statut i propise nije imala primjedbi na predloženi zaključak o utvrđivanju Nacrta Strategije prema mladima, a Komisija za mlade i obrazovanje dala je jedan amandman koji je predlagač prihvatio i on postaje sastavni dio nacrta da se u Akcionom planu, u oblasti sporta uvrsti i istraživanje i analiza stanja sporta i sportske infrastrukture na području općine Ilijaš, koje bi poslužilo izradi strategije za razvoj sporta na području općine Ilijaš. Ako imate konkretnih pitanja, pokušat ću da odgovorim, a ono što se direktno odnosi na sadržaj nacrta ovog dokumenta, zamolit ću Enisu da nam malo pomogne u davanju odgovora.

DAMIR FILIPOVIĆ – vijećnik SDP-a

Pohvalno je da raspravljamo uopšte o ovom dokumentu, obzirom da znamo kada je prethodna strategija prestala da važi. Ono što mene konkretno zanima jeste informacija o

sprovedbi i realizaciji svih onih zadataka koji su bili u prethodnoj strategiji i da vidimo koliko smo mi u toj strategiji ostvarili po pitanju mladih. Također, zanima me da li su ovi parametri valjani, obzirom kada je rađena analiza mislim da je prošlo više od godinu dana, to su parametri prema kojima je rađena strategija sada valjani u ovom periodu. Zanima me na koji način je jedno od udruženja, obzirom da ne licitiramo imenima, dobilo mogućnost da radi na izradi strategije iz razloga što smatram da je to trebala biti javna stvar i da se pozovu sva omladinska udruženja i da daju svoj doprinos na način da se uključe kako je to i ispravno. Također, nadam se da ćemo nastaviti sa sprovedbom Zakona o mladima, te formirati Vijeće mladih koje se već duži vremenski period nastoji oformiti.

ALMIR ŠPIODIĆ – VIJEĆNIK BPS-a

Svakako jedan dobar dokument da vidimo u kakvom se položaju nalaze naši mladi. Složio bih se sa kolegom Filipovićem, da vidimo šta je to realizovano iz prošle strategije koja je rađena i šta nije, da vidimo da li se mi uopšte pozivamo na ovu strategiju kada su u pitanju mladi ili se mi jednostavno oglušimo. Ono što je meni privuklo pažnju jesu podaci vezani koji su izraženi postotcima, vidimo da 60% mladih želi da ode iz ove zemlje. Također, veoma mali broj mladih posjećuje kulturne sadržaje po čemu svjedoči podatak od 66% što znači da na području općine Ilijaš i nemamo nekih kulturnih sadržaja osim što imamo prepoznatljivi brend u Ilijašu Čevljansku koridu, a očigledno da ni gore nemamo dovoljno mladih. Mislim da su ovi podaci poražavajući, ako uzmemo u obzir da je anketirno 4.120 ljudi, onda mislim da ovi podaci nisu baš u potpunosti relevantni za sve mlade, oni jesu relevantni za ovih 117, ali nisu relevantni za njih 4.000.

MUHAMED HANDŽIĆ – vijećnik BPS-a

Kao što reče Damir da je ovo ispitivanje javnog mnijenja, pogotovo sa aspektom na mlade, vršeno prije više od godinu dana, a znamo da je u posljednjoj godini najviše mladih napustilo našu zemlju, da vrše ispitivanja možda u ovo vrijeme tek bi onda bili poražavajući podaci. Ova strategija mladih, u cijelosti oslikava stanje mladih, kako u našoj općini tako u cijeloj BiH. Mladi su nezadovoljni, nemaju dovoljno prostora za zanimaciju koja njima pripada, prije svega za rad, školovanje. Ono što sam napomenuo kroz Budžet i rekao sam da bi trebali više sredstava ulagati u sport i ono što je interesantno za mlade, ali da se ona troše svrsi shodno. Mi smo formirali puno udruženja i od tih udruženja korist imaju samo pojedinci, oni koje stoje na čelu tih udruženja i niko više. Sredstva kada se dodjeljuju nekome, onda treba vršiti kontrolu i nadzor nad njihovim utroškom. S tim u vezi, ovdje se kroz strategiju mladih, pojavljuje ovoliko nezadovoljstvo i nepovjerenje, prema politici i prema vlastima i svim onim koji tretiraju ovu oblast. Moj prijedlog jednog od tih članova zakonodavne vlasti ovdje, da pored ove strategije koju je pripremila pomoćnica načelnika zajedno sa svojim saradnicima, trebamo hitno preuzeti niz mjera kako bi stvorili povjerenje kod mladih ljudi na općini Ilijaš.

SANJA ZAGORAC-JOZIĆ – pomoćnik načelnika

Zahvaljujem se svim vijećnicima koji su postavili pitanje, jer je to znak da su se trudili i pročitati nacrt ovog dokumenta. Sa nekim konstatacijama se ne bih složila, ali pokušat ću da odgovorim na postavljena pitanja. Kada se radi o staroj strategiji koja je istekla 2013. godine, pravljene su analize, naš propust je što ih nismo publikovali i odgovorno mogu reći da je preko 80% ciljeva iz te strategije realizovano, jer je ona vrijedila u jednom periodu

gdje smo imali znatnu orijentaciju međunarodnih donatorskih organizacija prema politikama za mlade podršku njemačkog internacionalnog društva za tehničku saradnju, podršku OSCE-a, što nažalost zadnje tri godine niko od njih se nije obratio, praktično po nekim njihovim projekcijama nema sredstava za te projekte za mlade. Što se tiče odluke da naš saradnik i partner u izradi ove strategije bude omladinsko udruženje "Carpe diem", moram vam reći da je na javni poziv za finansiranje projekata nevladinog sektora, koji se finansira iz budžeta za mlade za 2017. godinu, ovo udruženje apliciralo sa projektom izrade strategije za mlade, mi smo njihovu aplikaciju prihvatili i zaista im čestitam na ozbiljnosti u radu i sam kvalitet ovog dokumenta govori da su oni bili kompetentni da se uhvate u koštac izradom ovog dokumenta. Mislim da ova konstatacija da nisu bili uključeni mladi iz drugih udruženja, mi imamo problem sa organizovanjem mladih kroz taj vid, kroz omladinska udruženja, što se direktno reflektuje da mi nemamo više mladih, jer za Vijeće mladih morate imati četiri aktivne omladinske organizacije. Mi ih trenutno imamo pet registrovanih na području općine Ilijaš, od kojih aktivno radi samo jedna i to se vidi kroz sva ova sredstva izvještavanja. Ja bih voljela da ih ima petnaest, ali sad je trenutno tako. Mislim da je ova Strategija dala zaista jednu platformu za rad sa mladima ubudućih pet godina, ali ako mi ne budemo imali odgovor sa druge strane tj. strane mladih, ovo će ostati mrtvo slovo na papiru. Ovi projekti će se finansirati iz Budžeta za mlade koji će, nadam se, u narednim godinama biti povećan, ukoliko tu ne budemo imali interesa, ukoliko i dalje ostane jedna organizacija koja ima kapacitete da povuče ta sredstva onda mi nismo napravili ništa. Što se tiče relevantnosti ovog istraživanja, koje je rađeno u septembru 2017. godine, ja ću zamoliti Enisu koja će povući jednu paralelu sa istraživanjima koja je radio kanton, za izradu strategije za mlade Kantona Sarajevo, koja je negdje u formi prednacrt za izradu strategije za mlade Federacije BiH.

ENISA MEŠETOVIĆ – koordinatorica radne grupe za realizaciju projekata "Izrada Strategije za mlade općine Ilijaš za period 2018-2022"

Ja bih samo Damiru odgovorila, naravno slažem se sa tvojom konstatacijom i mi smo dugo raspravljali da li da uradimo novi upitnik ili da iskoristimo podatke iz ovog. Nakon što smo uradili analizu i dobili rezultate mi smo uzeli analizu kantonalnu i utvrdili da se većina podataka preklapa, pogotovo kada govorimo o odlasku mladih iz zemlje, o boravku mladih u kafićima i sl. Analiza se nalazi na stranici Ministarstva za obrazovanje i mlade Kantona Sarajevo i koga zanima može detaljnije pregledati. Mi smo aplicirali za projekat sa minimalnim sredstvima i odlučili smo da ipak uzmemo te podatke i kada smo radili presjek analize stanja iz prethodne strategije jasno se vidi gdje su uočljivi napretci, gdje još uvijek stagniramo, to je uglavnom slučaj obrazovanja. Danas imamo veliki broj mladih koji su završili magistarski studij, 2009. godine njih je bilo 0%, a danas je preko 14%. Također imamo napredak što se tiče interneta i te vrste komunikacije tako da smo sve ove vidove, gdje se može uticati na mlade, prebacili na društvene mreže i informisanje putem mreže, pa smo i tu imali zamjerke što je za informisanje 0 KM. Smatramo da tu imamo kapacitete da informišemo naše mlade i putem Javne ustanove Kulturni sportski centar, općinske stranice i putem naših FB stranica. Također, slažem se oko Vijeća mladih. Mi zaista tu stagniramo dugi niz godina. Međutim, problem je evidentan, konstantno imamo registrovana udruženja, međutim nemamo aktivna udruženja. Svi znamo da po Zakonu mladih moraju biti 2/3 aktivnih udruženja da bi mogli formirati Vijeće mladih, ali evo komisija koja se bavila aktivizmom mladih to je navela kao problem. Mi se zaista nadamo da ćemo naredne godine dobiti i to Vijeće mladih, buduće da sarađujemo i sa Federalnim vijećem mladih. Mi imamo punu podršku njihovog rukovodstva, njihovog predsjednika, te

njihovog čitavog odbora. Odlazak mladih iz zemlje, to je jedan problem sa kojim se suočavamo generalno. Mi ovdje radimo šta je u našoj moći da se to stanje promijeni. Možemo reći da evo što se tiče djece, mi smo u subotu imali 90 djece na radionici u Mrakovu i makar se nadam da u narednom periodu nećemo imati tih problema. Sad se postavlja pitanje, koliko mladi sami žele da učestvuju u kreiranju kulturnih događaja, mi kao organizacija smo inicirali da nastavimo sa festivalom koji se organizovao. Međutim, ovaj put da se udružimo svi i da zajednički napravimo jedan festival koji će postati tradicija kao ljetni festival mladih. Što se tiče sporta, naša Komisija koja je radila oko toga iskazala je veliku zabrinutost oko sportske rekreacije. Problem mladih, smatraju da nije problem oko udruženja odnosno sportskih klubova, oni su kazali da toga ima dovoljno, međutim da nema sadržaja za one mlade koji nisu aktivni sportisti. Treba raditi na promociji sportske rekreacije i ono što je novina u ovoj strategiji, što druge strategije nemaju jeste ekologija i tu su mladi sa umanjenim sposobnostima i to zaista želim da se zahvalim Sanji, koja je inicirala tu jednu oblast i naravno predsjednici udruženja koja je dala tu najveći doprinos i mislim da smo tu pokazali jedan veliki napredak budući da ni jedna strategija na području BiH nema posebno oblast za mlade sa umanjenim sposobnostima.

MUHAMED HANDŽIĆ – vijećnik BPS-a

Tuga je da nam je glavni kulturni događaj Čevljanska korida i duhovna muzika u općini Ilijaš. Znamo da i to sve treba, međutim navodim jedan primjer, mi sada imamo Dan državnosti koji se obilježavao od 22. pa sve do jučer i nismo bili u stanju da obezbjedimo ovdje ni jedan koncert za mlade u KSC-u. Taj KSC koji mi finansiramo sa 260.000 KM godišnje, on tamo nema svoju svrhu i sa pravom mladi se pozivaju i na to. Bolje bi bilo da tamo imamo koke nosilje nego da imamo tamo one koji rade i kreiraju program za mlade. Zbog toga imamo ovakav rezultat ispitivanja mladih i podataka koji ovdje dolaze i kojih se ja stidim kada izađem iz ove zgrade.

DAMIR FILIPOVIĆ – vijećnik SDP-a

Drago mi je da se našao ovaj akt na dnevnom redu i pozvao bih sve mlade koji su sastav ovog organa da uzmu i svoje učešće u daljoj diskusiji odnosno u preradi ovog akta kako bi na kraju dobili kvalitetan finalni akt. Ono što ću moliti nadležnu službu i zaposlenike koji rade na ovome, da pokušaju sa svog aspekta dati što više neke inicijative koje sam ja u prethodnom periodu upućivao, a radi se o pokretanju starta biznisa. Načelnika molim da razmotri tu mogućnost i usvajanje prijedloga. Isto tako sam za dizanje svijesti po pitanju kulture i sporta, te da idu čekovi za mlade, gdje bi se mladima uz ove stipendije koje budu dobijali dijelio ček u visini od 50 KM, koji bi mogli da iskoriste samo na kulturne manifestacije, sportske manifestacije i samim tim bi dizali svijest, jer ne bi imali mogućnost, a samim tim bi pospješili kulturu, pospješili sport i sl. Mislim da i vi načelnice treba da razmislite o tome i nadležna Služba to ugradi u nekom narednom periodu kroz Akcioni plan.

Diskutanata po ovoj tački dnevnog reda više nije bilo, pa je Općinsko vijeće jednoglasno usvojilo

ZAKLJUČAK

Član 1.

Utvrđuje se Nacrt "Strategije prema mladima općine Ilijaš sa Akcionim planom 2018-2022." i stavlja se na javnu raspravu

Član 2.

Nacrt "Strategije prema mladima općine Ilijaš sa Akcionim planom 2018-2022." stavlja se na javnu raspravu kako slijedi:

- objavom web stranice općine Ilijaš
- objavom na oglasnoj ploči općine Ilijaš
- javnim uvidom u maloj sali općine Ilijaš, zgrada općine II sprat

U javnoj raspravi učestvovat će: politke stranke, omladinska udruženja, vijeća učenika osnovnih i srednjih škola, ostale asocijacije i udruženja građana.

Član 3.

Javna rasprava prema u Nacrtu "Strategije prema mladima općine Ilijaš sa Akcionim planom 2018-2022." se određuje u trajanju od 15 dana, počev od 1.12.2017. godine do 15.12.2017.godine.

Član 4.

Nakon provedene rasprave zainteresovani subjekti mogu dostaviti primjedbe i prijedloge službi za društvene djelatnosti i poslove mjesnih zajednica u pisanoj formi ili putem e-maila: drustvenedjelatnosti@ilijas.ba, najkasnije do 16.12.2017.godine do 15 sati.

Primjedbe i prijedlozi dostavljeni poslije navedenog roka neće biti uzete u razmatranje.

Nakon što je iscrpljen dnevni red, zamjenik predsjedavajućeg Alen Hasković zaključio je četrnaestu sjednicu OV-a Ilijaš u 14:15h.

Zapisničar:
Maida Habibović

ZAMJENIK PREDSJEDAVAJUĆEG
OPĆINSKOG VIJEĆA ILIJAŠ

Alen Hasković, MA šum.

Ul. 126. ilijaške brigade br. 6, 71380 Ilijaš
Tel. ++387 33 580-620, 580-698, fax. 400-505,
Transakcijski račun kod VAKUFSKE BANKE,d.d. Sarajevo:1602000000710645
e-mail ov@ilijas.ba
Broj certifikata:20938

